


# KOMIPESA NA MAYELE

## NA YO MOKO TE

 Totikala ndenge totelemi mwa moke, mpo na libondeli. Bato boni bazali awa bazali na bosenga na mitema na bango, oyo bolingi Nzambe asalela bino likambo ya ndenge mosusu kati na likita oyo? Sikawa togumba motó liboso na Ye.

<sup>2</sup> Tata na Likolo, tozali bato bazui litomba ya kosangana awa na Nkombo ya Nkolo Yesu, kati na ekólo ya nsomi epai tokoki kosambela Yo kokokana na kokambama ya mitema na biso, kino sikawa. Pe tozali kobondela, Tata, likambo yango ezala bongo ntango molai. Pe sikawa, tika tozua mbano ya litomba monene oyo. Pe tika totia motema na biso mobimba na liyangani ya mpokwa oyo, kosambela Yo, mpo tokoka koloba ete: “Nzambe azalaki na biso na mpokwa ya lelo, kopambola bato na Ye.” Bikisa molimo nyonso ebungi oyo ezali awa na mpokwa oyo, Nkolo. Pe bazóngi nsima nyonso, bakoka kozonga na ndako na Nzambe. Nazali kobondela mpo na bato na bokono nyonso, babikisama, bato na mawa batambola, bakufi miso bámona, bákúfá matoi báyoka, lokumu pe nkembo ézonga epai na Yesu Klisto kati na bato na Ye. Tika tokanisaka yango ntango na ntango, Nkolo, mpo tosangani pe tosengi mapamboli oyo na Nkombo na Yesu. Amen.

Bokoki kofanda.

<sup>3</sup> Na lolenge moko, ntango nakómaka na Motel Ramada, na ngambo moko, emonanaka ntango nyonso lokola nazongi epai na ngai, mpo nayaka awa mbala mingi pe na—nakanisi bato basengeli kobanda koyeba ngai. Pe nasepeli na yango, mpo nakutani na bato mingi ya malamú awa na Motel Ramada. Baoyo ya Tucson pe ya awa, bato yango bazali na boboto mingi epai na biso, bapesi biso nzela ya kosala mayangani. Eumeli te, nazalaki na mayangani ya ngai moko na Motel Ramada, pe moyangeli na yango alingaki ata moke te nafuta mbongo mpo na esika yango. Ezali malamú mingi. Nazali kokanisa pe ntango nasalaka mibembo na bikólo ndenge na ndenge, kuna, bato oyo bazalaka malamú mpo na bato na Nzambe.

<sup>4</sup> Sikawa, uta mokolo na lomíngo eleki na mpokwa, to mokolo na lomíngo eleki nsima na nzánga, tolekisaki ntango kitoko mingi kati na Nkolo, to ngai mokó mpenza. Nalekisaki ntango malamú mingi kosepeli na mapamboli na Ye, pe boyokani ya Molimo Mosantu, elongo na libota na Ye.

<sup>5</sup> Na—nalingaka kokanisa, ete, elongo, tosambelaka Nzambe. Ozali etaliseli ya Nzambe, eteni ya Nzambe, ntango okómi

mwana mobali pe mwana mwasi ya Nzambe. Pe Nzambe azali kati na yo, kokokisa mokano na Ye, soki otikeli Ye nzela ya kosala yango.

<sup>6</sup> Bongo tozali kolikia, na mpokwa oyo, moto nyonso akobosana makambo oyo eleki, pe akotia makambo nyonso pembeni, pe mitema na biso ekotiamama mobimba mpenza na liyangani sikawa; bobele na mpokwa oyo te, kasi na likita oyo ezali kobanda. Na ntembe te, bantóma ebele basangani awa. Ya solo namoni baoyo bazali awa na eteyelo na mpokwa oyo, basangani mpo na likita oyo ekobanda lobi. Pe nasengi bato oyo bayaki awa mpo na mayangani ya kolamuka tozalaki na yango, ete, soki nyonso ekokoka, nakosepela botikala mpo na likita oyo. Tokozala na batei ya malamumu oyo batiami na manaka. Ndeko moko azui makoki ya koya te, pe, kasi tokozala na bato mingi awa bakozua esika na ye. Ngai moko nalingi kozala na likita oyo mobimba, mpo nasepela elongo na bandeko.

<sup>7</sup> Boyebi, tomataka awa, biso batei, mpo na koloba, pe ntango nyonso topesaka na bato nyonso oyo ezali kati na biso. Mokolo moko nateyaki liteya moko, esika Yesu alobaki: “Botala felele ya lísi, yango esalaka ata—ata mosala te pe esonaka bilamba te, nde Nalobi na bino ete Salomo na nkembo na ye nyonso alataki bilamba lokola yango te.” Pe nasosoli ete felele ya lísi esengeli kokola moi ná butu, kosona, kosala mosala, mpo na komikómisa kitoko. Kasi ezuaka lipamboli na yango moko te. Akomifungola, pe—pe baleki nzela bakoyoka nsólo ya malasi na ye. Nzoi ekozua mafuta ya nzoi oyo ezali kati na ye. Apesaka nyonso oyo azuaka na mosala na ye. Pe nabengaki liteya na ngai, *Mobateli Misie Lisi*, na bongo ezali liteya moko ya ndenge.

<sup>8</sup> Kasi—kasi ezali bongo, batei bamipesaka mpo na bato, pe na bongo, ezalaka malamumu kofanda pe—pe koyoka bato mosusu. Lokola koyetóla móto, tolingaka kofanda na nse ya miloli ya móto moko na moko pe koyótisa mitema na biso na Nsango Malamumu oyo bandeko na biso bazali koteya bato. Pe nazali kozongisa matondi mpo na libaku nazui kosala yango. Pe sikawa nazali kolikia ete na mpokwa oyo . . .

<sup>9</sup> Billy ayebisaki ngai akabolaki ba-kalati nyonso ya mabondeli. Pe tokokaki te kosala molongo ya mabondeli awa na eteyelo soki esengelaki. Bomoni, esengelaki bobima libanda pe bobaluka kuna, boleka na nzela ya molili, pe boya na nzela oyo. Bolingaki kokutana na makambo ya ndenge nyonso, liboso ete bokóma awa. Bato na malali ná bato oyo bakufá makolo balingaki komona mpasi mingi, mpo na kosala yango.

<sup>10</sup> Kasi toyebi te eloko nini Nkolo na biso akoki kosala. Ntango mosusu Akoki kokita mbala moko awa, na mpokwa oyo, pe—pe kobikisa bato nyonso oyo bazali awa, bokono nyonso. Oh, nakokosepela kutu námona yango na esika ya milongo ya mabondeli nyonso oyo nasilá kosala na bomoi na ngai, bobele—

bobele komona bonsomi na Nzambe kokita kati na bana na Ye ya botosi. Ngai—ngai nalingaka yango.

<sup>11</sup> Na momesano, soki bokutani moko ezali kati na yo moko ná bato, ndakisa kotiela bato maboko, ekoki kosalema, nandimi pe te ete bato mingi bakosala yango, ee, bakoloba: “Motei songolo atielaki ngai maboko, pe, nkembo na Nzambe!” Yango ekosala bongo ete bato batalela motei yango.

<sup>12</sup> Kasi soki okoki bobele kotelema wana, koteya Liloba, pe kotika Molimo Mosantu kobikisa moto moko moko, na bongo ezali solo mpenza bobele ngolu na Nzambe. Pe na ntango wana Nzambe akozua masanzoli nyonso, nkembo nyonso, pe likanisi ya eloko soko nini mpo na moto mosusu ezali te. Yango nde ntina oyo ngai, kati na mosala na ngai ya koteya, nákomaka epai na bato ebele te, longola bobele. . . Sikawa, lobi na mpokwa, tomekaki kobondela mpo na ebele na bato na ndenge tokokaki. Kasi kotiela bato maboko. . .

<sup>13</sup> Na momesano ezalaka nde na mpokwa, ntango mosusu Molimo Mosantu akitaka awa, pe abandaka Komimonisa, Komitalisa epai na biso. Pe ezali nde bongo, nabanzi, ezali solo, ntango Akoki kosala na bonsomi, toloba, bomoni. Ngai nakoki te koloba sikawa ete, “Mobali oyo, to mwasi *oyo*, to mwana *oyo*,” bomoni. Molimo Mosantu nde atambolaka kati na ndako pe Alobelaka moto oyo Alingi kolobela. Bomoni, ezalaka nde na bonsomi. Pe na nsima ekopesaka boyebi, mpo ete ezali elaka na Nzambe, pe ekopesaka boyebi ya Nzambe kati na bonsomi, pe ekokitisa lisusu Bozali na Ye kati na biso. Tokosengela komona yango pe kosepela! Pe ata soki. . .

<sup>14</sup> Bolobaka: “Ee, loboko na ngai ekufá. Nazalaki kuna lobi na mpokwa. Na—na—nazali komiyoka ata malamú te.” Oyo wana ezali na likambo moko na kati te. Mpo na yo, likambo esili kosila. Na ntango wana okotala lisusu loboko na yo te, okotala nde elaka, omoni. Nzoka nde, okoki te koloba: “Ee, Ndeko *songolo* abondelaki libondeli ya kondima te, to ndeko boye na boye.” Bozali na Nkolo nde epesi yo kondima, omoni, pe na nsima Atindaki Liloba na Ye pe Abikisaki bango.

<sup>15</sup> Sikawa, lobi na mpokwa na—nazangaki lisusu kokokisa elaka na ngai. Nakomeka mpenza ete nakokisa yango na mpokwa oyo, soki nakokoka. Bongo moto moko alobaki: “Lobi na mpokwa otikalaki kati na liteya na yo te.” Te, na—natialaki kati na yango te; mpo ete, nakoyebisa bino mpo na nini. Nazalaki na likanisi ya koteya liteya moko, sikawa nabosani soki ezalaki nini, “*Kasi Nzambe Na Mawa Mingi*.”

<sup>16</sup> Pe nabandaki komeka kolimbola ndenge Polo alobaki wana, ntango alobaki: “Biso oyo kala,” na ntango moko boye, kala, “tokufaki, kati na masumu pe kati na bikweli; Nzambe azalisi biso na bomoi, apesi biso bomoi.” Bongo, bomoni, liboso ete

eloko moko ezalisama na bomoi, esengeli ete eloko moko ezala wana mpo na kopesa yango bomoi. Ya solo.

<sup>17</sup> Bongo, bomoni, soki ozalaki kati na boyebi liboso ya Nzambe, wana okómi eteni na Nzambe. Pe lolenge moko mpamba mpo na kozala mwana mobali na Nzambe to mwana mwasi na Nzambe, ezali ete osengeli kozala eteni na Nzambe, pe Nzambe azali mobimba te soki yo ozangi. Na ntembe te. Ya solo, mpo ete ezali bobele Moko, liziba ya Bomoi na Seko ezali bobele moko, pe ezali nde Nzambe, pe bobele Ye moko nde azali na Bomoi ya Seko. Bomoni? Bongo, ozalaki eteni na Ye, na lolenge ete ezali etaliseli, to ozalaki kati na makanisi na Ye na ebandeli. Pe na ntina yango, lokola Akanisaki yo na ebandeli, esalaka ete obendama epai na Ye. Yango nde esengeli kopesamela bomoi. Bato mosusu, bomoi ekopesamela bango te; bazali na bango na yango te, esili.

<sup>18</sup> Ezali lokola soki otii mbuma ya lisangu na nse na mabelé, oyo ezangi. . . Ata soki ezalaki kitoko ndenge nini, soki ezangi momboto ya bomoi kati na yango, ekoki kopesamela bomoi mokolo moko te. Kasi esengeli ete momboto ya bomoi ezala kuna liboso.

<sup>19</sup> Pe nakamataki mwa lisolo wana ya mpongo, oyo azalaki kotambola elongo na ba-sósó ná bana ya sósó, mpo ete atetamaki pe abotamaki wana, kasi azalaki soko moke te komiyoka lokola bana ya sósó wana. Pe, boyebi, ntango mama na ye alekaki wana pe agangaki, ayokaki mongongo moko oyo esepelisaki ye mpenza mingi, mpamba te, bomikanisela, azalaki mpongo, banda na ebandeli. Nyonso oyo asengelaki na yango, ezalaki nde ete amiyeba, ayeba esika na ye.

<sup>20</sup> Pe ezali bongo mpo na mondimi nyonso. Yo óbotamaki te mpo na mokili oyo. Ósalemaki na elili na Nzambe, mpo ózala mwana na Nzambe. Pe esika na yo ezali kati na elielo na ba-sósó oyo te. Ozali nde mpongo.

<sup>21</sup> Pe boyebi, nabandaki koloba na ntina na “mpongo” wana pe nazalaki lisusu kokoka ete nazonga na mabele te, bongo natikalaki bobele. . . Nateyaki ntango molai mpenza, na bongo nabosanaki liteya na ngai, pe nabungisaki makambo oyo nakomaki pe nyonso mosusu. Nalekisaki ntango moko malamú. Kasi ezalaki nde bongo, ezalaki nde na ntina na “mpongo” wana.

<sup>22</sup> Sikawa, tika ete Mpongo wana, Nzambe! Boyebi, Nzambe akokanisaka basakoli na Ye na ba-mpongo. Pe Ye moko Amibengaka mpongo; Azali Yawe Mpongo, Papa Mpongo.

<sup>23</sup> Pe ntina oyo Amibengaka bongo, ezali mpo ete mpongo akoki kopumbwa likolo mpenza koleka ba-ndeke nyonso, pe ete asalémá kokesana na ba-ndeke mosusu nyonso. Bongo, atongaka zála na ye na mabele lokola ba-sósó pe baoyo mosusu te, kasi amataka likolo mpo na kotonga zála na ye kuna.

24 Likambo mosusu, ezali ete, azali ndeke moko oyo asalémá na lolenge mosusu. Bongo soki—soki nzéngó, to yángánga, to engondó, to ndeke mosusu nini, ameki kolanda ye kuna na likolo, akopanzana; asalémá mpo na yango te. Esengeli kozala moto ya ndenge mosusu mpo na komata likolo kuna. Nsála na ye etongámá makasi koleka ya ba-ndeke mosusu nyonso.

25 Pe—pe liso na ye émonaka mosika koleka ya ba-ndeke nyonso. Pe koleka azali komata likolo koleka azali komona malamú. Ee, ba-ndeke mosusu wana, ntango bakómi likolo mpenza epai basengelaki kokóma, bamonaka lisusu te, lokola ngembó. Pe ezali ndenge moko mpo na . . . Ee, soki batiki bindimeli wana, bakoyeba lisusu ata eloko moko te na ntina na Yango. “Mikolo na bikamwa esílá koleka,” mpo na nini? Bakoki komona Yango te.

26 Kasi ba-mpongo bakoki komata likolo, kino likolo ya Likolo kuna. Litomba nini komata likolo Kuna soki okoki komona te? Oh, nazali na esengo mpenza ya kozala moko na bango, pe ya kosangana sikawa elongo na zála mobimba oyo etondi na bango.

27 Tokamata na Kondimana ya Kala, na Buku ya Masese, oyo ekomamaki na Salomo, moko na bato oyo baleki na bwanya kati na mokili, longola Nkolo na biso Yesu. Kasi Ye azalaki mpenza lokola Salomo te, na ndenge ete Salomo azalaki moto oyo abotamaki na mwasi pe oyo abotamaki na tata ya mokili, Dawidi. Kasi Yesu azalaki Mwana oyo abotamaki na mongondo, pe Azalaki bobele moto mpamba te; kasi Azalaki Nzambe, Moto-Nzambe, pe Alekaki ata moto, Azalaki koleka moto. Bomoni? Kasi Salomo azalaki bobele moto lokola ngai na yo, pe asengaki bwanya epai na Nzambe, mpo na koyangela ekolo na ye. Pe azuaki likabo na bwanya, moto na mayele koleka oyo tosílá kozua libanda na Nkolo na biso. Akomaki Masese, pe nakanisi ete ezali malamú mingi.

28 Pe tokokamata sikawa Buku ya Masese, mokapo ya 1, pe, to mokapo ya 2, kutu, pe nzela ya liboso ya Masese, ya 2, kobanda na 1. Masese 2, kobanda na 1, molongo na batoli oyo Salomo azali kopesa na bana na ye: “Mwana na ngai, soki oyambi. . .” Bolimbisa ngai.

29 Ezali nde Masese 3:1. Bolimbisa ngai. Natalaki nde awa na—na buku na ngai, pe nazali komona Masese 3 na esika ya 1 to 2. Bolimbisa ngai. Masese 3:1.

*Mwana na ngai, kobosana mateya na ngai te; motema na yo étosaka mobeko na ngai.*

*Mpamba te yango eko . . . ekobakisela yo mikolo ebele, bomoi ya molai pe ya kimia.*

*Kotika makambo ya boboto pe ya bosembo te : kanga yango na kingo lokola mayaka, koma yango na kati ya motema na yo.*

*Boye okozala moto ya bolingo pe ya mayele, na miso ya Nzambe pe ya bato.*

*Tia motema na yo mobimba na Yawe; komipesa na mayele na yo moko te.*

*Na makambo na yo nyonso kanisaka ye, bongo ye akolakisa yo nzela ya malamumu.*

<sup>30</sup> Oh, nakanisi ete ezali eteni ya Likomi oyo eleki malamumu! Sikawa nalingi kozua lokola motó na liteya, ekamatami na—na nzela ya 5, *Komipesa Na Mayele Na Yo Moko Te*.

<sup>31</sup> Bongo oyo ezali li—liteya moko ya ndenge mpenza mpo na mokolo oyo tozali kobika kati na yango, mpo ete ya solo, bato lelo oyo bazali kotia miso mingi likolo na koyekola pe likolo na mayele ya makambo oyo tozali na yango, na mokolo na—na boyebi oyo. Kasi tomoni maloba ya ndenge oyo awa, lokola biteni ya Makomi mosusu, ezali na esika na yango, pe tozali kolikia ete Nzambe akosala ete tomona esika yango.

<sup>32</sup> Lelo oyo tozali kotinda bana na biso na kelasi, mpo bazua mayele. Soki basilisi eteyelo ya liboso, totindaka bango na eteyelo ya mibale mpo na kozua mayele ya malamumu na ngambo ya boyebi. Bongo soki basilisi yango, bana mosusu bakozua ata libaku ya kokende na eteyelo ya likolo, bakokende na eteyelo ya likolo mpo na kokokisa kelasi na bango pe mayele na bango na ngambo ya boyebi. Oyo esengami mpo na bango. . . Mbala mingi, mpo na kozua mosala, ekosengela ete osilisa ata kelasi ya eteyelo ya mibale, to kelasi ya eteyelo ya likolo, pe bongo na bongo.

<sup>33</sup> Nzoka nde, moto na mayele Salomo alobeli biso ete, “tomipesa na yango te, na mayele na biso moko te; tomipesa na makambo wana te.” Mpo ete, tozali komituna mpo na nini akokaki koloba likambo ya boye, ezali mpo ete na momesano mayele na biso ya mikolo oyo ezalaka mingi bwanya ya moto, oyo ekesani na Liloba na Nzambe. Nakanisi ete ntina oyo Salomo azalaki kopesa bana na ye toli, ezalaki te ete bázala bayinga, kasi ete bamipesa na mayele na bango moko te.

<sup>34</sup> Pe nakanisi ete elingaki kozala elendiseli moko ya malamumu lelo, soki tolobelaki bana na biso pe bana na Nzambe, ete, ezali malamumu kozala na mayele ya mokanda, toboyi yango te; kasi soki mayele ya mokanda yango ekesani na Liloba na Nzambe, na ntango wana ómípésá na Liloba pe ótika mayele ya mokanda yango, omoni, na ntina na Liloba. Mayele ya mokanda ekosunga yo pe ekopesa yo mosala kitoko, na ntembe te okozala moto kati na bato ya mayele, kasi, ezali malamumu, na ntembe te ekosunga yo mingi, ekosunga yo na ngambo ya misolo pe na ngambo ya—ya makoki na yo ya lobiko, ekosala ntango mosusu ete ózala malamumu mpo na yango.

<sup>35</sup> Kasi ómikanisela na likambo moko, mwana na ngai, osengeli kokufa. Ata soki ozali na mayele ya mokanda ndenge nini, ata boyebi ya ndenge nini okokaki kozua, osengeli ata bongo

kokutana na liwa, mpamba te ekomami ete, “Moto asengeli kokufa, pe na nsima Kosambisama ezali.” Pe Nzambe, ntango . . . Liwa ezali mpenza mabe te, kasi koleka na Kosambisama nde ezali mabe. Bongo, okoki kokufa, “kasi na nsima Kosambisama ezali.” Pe Nzambe akotuna yo te ba-kelasi boni otangaki ntango ozalaki awa na mokili, boyebi boni ozuaki, soki ozuaki lípolome na yo ya lettre, to lípolome nini okokaki kozua, ata lokola motei. Bakotuna yo mpo na yango te.

<sup>36</sup> Kasi bakotuna yo nde mpo na makambo oyo osalaki na lisosoli ya Liloba na Nzambe oyo ozalaki na yango. Likambo ekoya nde wana, mpo na Yango. Mayele na yo ya mokanda ezali malam, kasi Liloba na Nzambe ezali Bomoi. “Liloba na Ngai ezali Bomoi,” pe koyeba Yango ezali Bomoi. Pe Ye, Alobaki: “Koyeba Ye.” Azali Liloba. Na bongo okoki koyeba ye bobele na nzela ya Liloba, mpamba te Azali Liloba. Pe lolenge moko mpamba mpo na yo ya koyeba Ye yango wana, ezali nde na nzela ya Liloba na Ye.

<sup>37</sup> Moto moko akoki koya wana pe koloba: “*oyo* nde Nzambe,” to “*oyo wana* nde Nzambe,” to “*oyo* nde Nzambe,” to “*oyo* ezali sembo,” kasi tozonga na Liloba, oyo ezali Solo.

<sup>38</sup> Pe Liloba ezali mpenza lokola mo—Monzoto ya nórdi, ezali monzoto ya solo. Ata mokili ememami na ngámbo nini, Monzoto ya nórdi ezali katikati ya mabele. Okokokisa likongá ya busóle kolandana na Monzoto ya nórdi. Ezalaka ntango nyonso katikati ya mabele. Minzoto mosusu etambolaka zinga zinga na mokili, kasi Monzoto ya nórdi eninganaka te.

<sup>39</sup> Boye busóle ezali Molimo Mosantu, pe (yango) e—ekanganelo na yo ezali Monzoto ya nórdi, bongo Molimo Mosantu akokamba yo ntango nyonso na Liloba. Molimo Mosantu akokamba yo na eloko mosusu te bobele na Liloba na Nzambe. Bongo ndenge nini moto akoki koyamba endimeli, ntango yango ekesani na Liloba, pe akoba koloba ete azali na Molimo Mosantu? Molimo Mosantu akokamba yo mosika na yango. Esengeli Molimo Mosantu ákamba yo na Liloba, mpo Azali Liloba. Azali Liloba, pe Akoki bobele. . . Lokola nto—ntonga ya busóle elakisaka bobele Monzoto ya Nordi, ekoki kobendama bobele na ngambo wana. Bongo lokola Molimo Mosantu azali Mokólo pe Mokomi ya Liloba, pe Ye nde apesaka Yango bomoi, ndenge nini Akoki kokamba moto yango na eloko mosusu libanda na Liloba?

<sup>40</sup> Bongo soki bato balobi bazali na Molimo Mosantu, pe bandimi makambo makeseni na Liloba, ekotalisa ete bazali na Molimo Mosantu ya solosolo te. Bomoni? Ekoki kozala molimo moko, naboyi te, kasi e—ezali Molimo Mosantu ya Klisto te. Sikawa, boyebi, mbala mingi, bato bazuanaka milimo moko na mosusu; pe yango ekoki kokamba bato, etonga na bato, na eloko moko, kasi e—ekokamba bato na Klisto te. Kasi Molimo Mosantu akambaka ntango nyonso epai na Klisto, pe Klisto azali Liloba.

<sup>41</sup> Tomoni yango polele mpenza kati na Biblia. To, ezali nde ngai. Nakoki komikosa ntango mosusu, kasi, na lisosoli na ngai, nandimi te; ntina yango oyo: “Komipesa na lisosoli ya makambo na yo moko te.” Soki omipesi na mayele na yo moko, na ntembe te okobima mpenza libanda ya nzela. Okoki te komipesa na mayele ya moto mosusu, mpo na likambo ya Bomoi. Mpo na kozua Bomoi, osengeli komipesa na Liloba. Yango nde Bomoi.

<sup>42</sup> Tomoni yango, longwa na ebandeli. Elakisameli biso mpenza polele, longwa na ebandeli, ete Nzambe apesaki Liloba na Ye na libota na Ye ya liboso na mokili mpo babika na Yango. Basengelaki kobika bobele na Liloba na Ye. Bongo, ezali te na kolia bilei, pe bongo na bongo. Kasi na Liloba na Ye nde basengelaki kobika, Libela. Pe ntango nyonso bazalaki kobatela Liloba yango, bazalaki kobika Libela. Kasi bobele ntango eteni ya lisakoli ya Liloba yango etiamaki mabe, moniololo mobimba ekatanaki, pe bato bakotaki na kufa. Bomoni, sikawa totala.

<sup>43</sup> Ewa, na ntembe te, azalaki na mayele; moto ya liboso kouta na Adama, oyo azalaki mwa—mwana na Nzambe. Pe Ewa, na lolenge azalaki na yango mpenza oyo lisumu ezalaki te, esika moko te mpo na lisumu, azalaki mpenza na lisosoli malamumu mpo na Nzambe. Mpamba te, nsima na nzanga nyonso, ye ná mobali na ye bazalaki kotambola na nse ya malili ya elanga, na mpokwa, bazalaki pe kosolola na Nzambe elongo miso na miso. Bo—boléma nini esalaki moto oyo azalaki kotambola elongo na Nzambe, miso na miso, mikolo nyonso, pe na nsima ábongola makanisi mpo na makambo oyo ememaki ye mosika na Liloba na Nzambe!

<sup>44</sup> Tozali na yango kino lelo. Bato bazali kokanisa makambo oyo ezali komema bango, na pete mpenza, mosika na Liloba na Nzambe, nsima na bango kozala Liboso na Nzambe. Bazali komona Liloba na Nzambe koteyama, Liloba na Nzambe komonisama, balangwi masanga pe basumuki koya na etumbelo pe kobongola mitema, pe kokóma bikelamu ya sika kati na Klisto, bato ya bomoi mabe kokóma basi malamumu pe mibali malamumu; pe na nsima bazali kopesa mokongo na Lipamboli oyo ememaki bango na Bomoi wana, pe na nsima bazali komibebisa mpo na kolanda endimeli moko, mpo bayebana mingi koleka to—to mpo bakota na molongo na oyo babengaka bato ya lokumu.

<sup>45</sup> Kasi, bozali kati na bato ya lokumu koleka: bana mibali pe bana basi ya Nzambe. Ee, ngai nalingaka lisanga yango koleka kozala elongo na bakonzi nyonso ná bankúmu nyonso, pe nyonso mosusu. Nakosepela kozala na bato ya komikitisa wana, ata bayebi te bokeseni kati na loboko ya mobali ná ya mwasi! Ntango bayebi Nzambe, balingi Ye pe bazali kosalela Ye, bango nde bato ya lokumu na Lola, mpo na ngai. Iyo, misie!

<sup>46</sup> Bongo, tomoni Ewa, na pete mpenza, andimaki ete Satana atangola ye na Liloba na Nzambe, pe amipesaki na mayele



na ye moko, mpamba te, Satana atalisaki ye eloko moko oyo ekokanaki te na lisosoli malamuna na ye na ntina na Nzambe. Kasi ye azuaki eloko mosusu oyo monguna, Satana, ayebisaki ye, pe andimaki yango.

<sup>47</sup> Sikawa tomoni mbano na yango. Yango ememi libota mobimba ya bato na liwa, mpo ete mama ya liboso na mokili, amipesaki na mayele na ye moko, oyo ekesanaki na Liloba na Nzambe, pe amemaki libota mobimba ya bato na liwa. Sikawa bondimi yango? [Losambo balobi: “Amen.”—N.D.E.] Yango nde Liloba. Ee, mwasi azalaka ntango nyonso . . .

<sup>48</sup> Kati na Biblia, etaliseli ya lingomba ezali mwasi. Pe lingomba lelo ekoki koyamba biyambweli to bindimeli mingi, pe ekomema liyangani mobimba kokabwana ná Nzambe. Bato bazali kondima makambo yango, esika ya Liloba na Nzambe, bazali lokola Ewa. Pe likambo yango esalemaka mbala na mbala, kino ememi libota mobimba oyo mosika na Liloba na Nzambe.

<sup>49</sup> Ntango Liloba etalisami, pe Liloba emonisami, baboyi koyamba Yango, mpo bakosala yango te, mpo bazali komipesa na mayele na bango moko. “Losambo oyo etongamaki awa. Ezali ndako kitoko. Ezali ebongiseli monene. Ezali eteni ya nzoto monene ya bato. Mpo na nini tokoki kozala kati na yango te? Nakotiela yango motema.” Kotia motema na mayele na yo moko te, kasi tia motema na Liloba na Nkolo!

<sup>50</sup> Bongo—bongo, na suka, libota mobimba ekotaki na kufa, ndenge nalobaki, ezali pe bongo sikawa, mpo na bato mingi oyo bazali kotia motema na mayele na bango moko, biyambweli ná bindimeli na bango, pe nyonso wana, kolobaka: “Liloba na Nzambe na mobimba ezali solo te, eteni na Yango epemelami kasi eteni mosusu te.” Ndenge nini okoki kondimela Biblia, soki eteni moko na Yango epemelami mpe eteni mosusu te? Soki moko, eteni moko ezali mabe, na bongo yango nyonso esengeli kozala mabe. Yango nyonso esengeli kozala solo, ezali mpenza solo.

<sup>51</sup> Pe bamoko ya biteyelo oyo ebengami ya Biblia, oyo ebebisami, eteyaka boyebi ya bato, na ndenge na ndenge, kuna basanganaka elongo na likita, pe balobaka: “Sikawa boyoka, mikolo na bikamwa, esukaki na mikolo na bantoma.” Pe bato mingi na nse ya bokonzi ya episkopo to ya bato minene, bakofanda wana pe bakoloba: “Ee, soki nakoki koyokana na ye, na ntembe te, nakokoka kokitana na ye.” Bomoni, na ntango wana ómipesi na mayele na yo moko, na esika ya kotelema likolo na Liloba na Nzambe. Yango nde ezali kobota makambo oyo.

<sup>52</sup> Eleki ntango moke, moto moko . . . Nakotaki na niongo na ntina na mpako. Pe balobelaki ngai, balobaki: “Kasi, bayangeli na yo, nakanisi, bazali bobele bindimándima.”

<sup>53</sup> Nalobaki: “Soki nazalaki na moyangeli moko kati na likita, oyo azali na likanisi oyo ekeseni, pe aboyi kotelema (ata nani azali kolobela yango) mpo na koloba likanisi na ye na ntina

na yango, nakolongola ye na likita.” Iyo, misie. Ata ekeseni na kondima na ngai, nakolinga ete ye áloba oyo azali kokanisa ete ezali malamú. Natiaki ye wana mpo na yango, mpo na komona oyo ye akoloba. Kasi tozali na yango.

<sup>54</sup> Botala, Yesu alobaki, kati na Yoane 10: “Bampate na Ngai bayebi Mongongo na Ngai.” Mongongo, na ntembe te, ezali Liloba na Ye, ntango Azali koloba. “Bampate na Ngai bayebi Mongongo na Ngai. Mongongo na Ngai etalisamaki polele na bango ete ezali solo. Etatolamaki ete ezali Mongongo na Ngai.” Bongo, sikawa botala, bazali bato balandaka mongongo mosusu te. Ata moke te. “Bampate na Ngai bayebi Mongongo na Ngai, pe bakolanda mopaya te.” Na elobeli mosusu, bakososola mongongo ya likindo te oyo ezali koteya na bokeseni na Liloba. Bampate bakososola yango te, ndenge moko pe na mpongo, ya lobi eleki, ekokaki kososola te kolela ya sósó. Bakoki kososola yango te, mpo bazali ba mpongo. Ezali pe bongo na bana na Nzambe ya solosolo oyo babotami mbala mibale, bakososola bobele makambo oyo ya Nzambe.

<sup>55</sup> Sikawa moto moko akoloba: “Ee, sikawa tala, nakanisi, okoki kosala *boye*. Ezali, nandimi ezali *boye* te. Nandimi ete mikolo na bikamwa esílá koleka. Nandimi te ete oyo ezali kobikisama uta na Nzambe. Nandimi Yango te.” Kasi Moklisto ya solosolo oyo abotami mbala mibale, mato na ye ekoyoka yango te, akososola yango ata moke te. Pe ndenge nini moto oyo andimeli Nzambe, pe akoki kotanga Biblia pe komona ete Azali ndenge moko lobi, lelo, pe libela, akoki kokóma na kondima likambo ya boye, nákososola yango te.

Bongo, bazali solo komipesa na mayele na bango moko te.

<sup>56</sup> Ndakisa lokola be—bebe. Kamata bebe moke, oyo abotami pe asílí kolala mbala moko na ntolo ya mama na ye, oyo ameli mabele ya móto uta na ye, oyo alalisi motó na ye na ntolo na ye, ata auti kobotama eleki ngonga moke. Nsima na mokolo moko to mibale, longola ye pembeni na mama na ye pe tia ye na ntolo ya mama mosusu, akotombola mwa makolo na ye likolo pe akolela. Azali mama na ye te. Bomoni, asílí kozua eloko moko kati na ye, mpo azali eteni ya mama oyo, mokili esílí kopesa ye lolenge moko mpo na koyeba mama na ye moko.

<sup>57</sup> Bongo soki mokili epesi bebe lolenge moko mpo na koyeba mama na ye, oyo aboti ye, koleka boni mwana na Nzambe oyo abotami na nzela ya Molimo na Nzambe. Ayebi mama na ye! Ayebi, mpo ete abotami na nzela ya Liloba, pe azali kososola Liloba. Tia ye esika mosusu, na ntembe te ekozala e—esika na ye te, akolongwa wana na lombangu nyonso. Mpamba te azali na, amipesi te na . . .

Moto moko akoloba: “Boye zela, molingami, oyo nde mama na yo sikawa.”

58 Azali mama na ye te, mpo azali na lolenge ya koyeba ete azali eteni ya mama na ye. Oyo nde mama na ye, moto mosusu akoki kozua esika na ye te. Ayebi mama na ye moko. Botala, ndenge ezali, ezali mpenza bongo. Nzambe asálá biloko nyonso na lolenge na yango.

59 Banyama na lolenge na bango. Mbala mingi ntango tosangisaka banyama, tosangisaka bitonga nyonso ya banyama ná bana ngombe, nazalaki komituna ndenge nini bakoyeba bamama na bango moko. Sikawa, bango, ezali bango kokita bangomba, banyama nyonso bakosangana. Ngo—ngo—ngombe ya mwasi oyo azali na mwana, ntango mosusu mwana ngombe oyo azali na nzala akomela epai ya mama mosusu, soki azali mpenza na nzala; kasi ntango totelemisa bango, libanda na matiti, mama wana akobanda koluka na kati na lisanga ya bangombe ná bana ngombe kino akozua mwana na ye moko, pe mwana ngombe akokima nsima ya mama na ye. Ayebi mwa ekimeli na ye, pe ye ayebi eleleli na ye. Azali kobelela mpo na mwana na ye, pe bamama mosusu bakobelela kino bokoki ata kososola eloko moko te, kasi mwana ngombe yango akolanda mbela wana ya mama na ye, mpo azali eteni ya mama yango.

60 Pe Moklisto oyo abotami mbala mibale uta na Likolo, azali eteni ya Liloba oyo. Ya solo. Akolanda mama mosusu te. Azali eteni ya Liloba. Atelemaka kati na Liloba. “Soki babeti kelelo malamumu te, nani akomilengela mpo na etumba?” elobaki Polo. Ayebi mongongo ya Liloba. Botala ndenge—ndenge ezali, loboko na Nzambe ezali kolanda bango uta na ebandeli. Ayebi ete ye abongisama liboso, azalaki kati na Solo ya Nsango Malamumu. Ayebi ete abotamaki na Molimo na Nzambe. Ayebi ete Molimo na Nzambe akoki koboya Liloba na Nzambe te, yango wana akolanda mopaya te. Botala ndenge . . .

61 Nazalaki kotala makambo moko nakomaki awa. Na—nalekaki yango, kasi miso na ngai ekweyaki likolo na eteni ya Likomi, nakanisaki nalobela yango lisusu. Botala ndenge bampate na Ye baponama liboso balandaki Ye, na mikolo ya bato minene koleka ya likindo ya ntango wana. Babimaki mbala moko, mpo bayebaki Ye. Bayebaki oyo Liloba elakaki mpo na ntango wana. Bayebaki lolenge Masiya akozala ntango Akoya. Pe Simona Petelo ayaki epai na Ye, ntango azalaki bobele “Simona”.

62 Pe Andelé amekaki koyebisa ye likambo yango. “Mobali wana azali Masiya.” Bongo, Simona, na ntembe te, azalaki ntango mosusu moto ya motó makasi, pe alingaki kokende te.

63 Kasi ntango abelemaki Liboso na Yesu, ntango Yesu alobaki: “Nkombo na yo Simona, pe ozali mwana na Yona.” Toyebi ete Yesu alobelaki bantoma na Ye ete Ayebaki bango, na ye, “liboso na kozalisama na mokili.” Bazalaki bitaliseli ya makanisi na Ye. Na bongo, lokola momboto ezalaki kati na ye, pe ayebaki oyo

Liloba elobaki pe elakamaki ete Masiya akozala mosakoli. Pe ntango amonaki yango, likambo ya kolóbo mbisi esilaki. Ayebaki na ntango wana ete akotika minyama na ye, mpo akokóma—akokóma molóbi ya bato. Mpamba te . . .

<sup>64</sup> Bongo, bato mosusu bazalaki wana, oyo bamonaki likambo yango moko kosalema, pe batiaki yango na ngambo ya “molimo mabe.” Ezalaki bato na likindo, mpo ekokanaki te na malakisi ya likindo na bango. Pe baboyaki yango, mpo bamipesaki na mayele na bango moko, ya balakisi na bango; nzoka nde, Yesu Klisto ayaki kokokisa Liloba oyo elakamaki, pe bango bakufaki mpenza miso mpo na komona yango. Bazalaki komipesa na oyo banganganzambe balobaki, pe na oyo lingomba elobaki, na esika na oyo Nzambe alobaki.

<sup>65</sup> Sikawa Yesu apamelaki bango mpo na yango. Alobaki: “Bozali kolukaluka kati na Makomi mpo bobanzi ete na Yango bokozua Bomoi na Seko. Pe Yango mpenza nde ezali kotatola mpo na Ngai. Makomi oyo Nasengi bino bolukaluka kati na yango, ezali koyebisa bino nani Ngai nazali.”

<sup>66</sup> Kasi balingaki te komipesa na oyo Liloba elobaki, bamipesaki nde na mayele na bango moko. Bamipesaki na mayele na bango moko. Pe Makomi eyebisi biso ete bazipamaki miso. Ezipeli ya likindo ya bango moko ebomaki bango miso.

Bokoloba: “Ndeko Branham, olingi mpenza koloba nini?”

<sup>67</sup> Tala epai nalingi kokóma. Likambo yango ezali kosalema lisusu, na lolenge ete, mibali ná basi, pe bato bakomipesa na lingomba oyo bakoti kati na yango pe bakómi moko na yango, ata Liloba na Nzambe elobi nini mpo na yango. Bazali kokoba bobele na yango, komipesa na mayele na bango moko, pe bazali kotiola Liloba na Nzambe, lokola Ekomama (naino) ata kokomama te. Ezali momboto ezanga bomoi na bomoi ya moto. Ezali na bomoi ya nzoto, kasi ezangi bomoi ya molimo kati na yango mpo na kozua bomoi. Ezipeli ezalaki likolo ya bilongi na bango.

<sup>68</sup> Sikawa botala, bazalaki na makanisi na bango moko na ndenge Nzambe asengeli kozala, bazalaki na makanisi na bango moko na ndenge Masiya asengeli kozala. Kasi Liloba elobaki ndenge Masiya asengeli kozala! Bongo, bomoni, bazalaki na mayele na bango moko na ndenge Akozala. Na ntembe te yango nde nganganzambe mokonzi alobaki: “Banganganzambe na ngai nyonso na nse na ngai, ntango Masiya akoya . . . Totongi tempelo monene awa. Tosali makambo oyo nyonso. Pe Biblia elobi: ‘Na mbala moko Akokota na tempelo na Ye,’ pe nyonso wana. Ntango Akosala yango, Masiya akoya awa mbala moko pe Akomimonisa epai na biso, pe Akoloba: ‘Ngai nde Masiya. Naye. Ngai nde Masiya oyo bozalaki kozela.’” Ee, ntango Ayaki, Ayaki na lolenge ekesenaki mosika na ndenge bango bazalaki

kokanisa, pe bayebaki Ye te. Bayebaki te nani Ye Azalaki. Kasi baoyo ya Ye. . .

69 Pe nini elingaki kosalema soki mokosi moko akendeki kuna pe alobaki: “Ngai nde Masiya. Nazali Molakisi *songolo*”? Balingaki koyamba ye.

70 Kasi ntango ekómi na Moto oyo mbotama na Ye eyebanaki malamumu te, oyo Ayekolaki ata na kelasi moko te oyo Asengelaki kotanga, oyo Ayebaki ata makambo na likindo te, Azalaki ata na kalati ya mondimi te; kasi Azalaki ndimbola ya Liloba na Nzambe, oyo emonisami. “Misala Nazali kosala, ezali koyebisa bino Oyo Ngai Nazali. Soki Nazali te kosala misala oyo elakamaki ete Nakosala, na bongo bondima Ngai te.”

71 Boye tokoki te kokokanisa yango na mokolo oyo? Ntango Molimo Mosantu azali koya, balingi kotia yango mpo na eleko mosusu, ntango Azali koya na misala pe na komonisama na nguya na Ye ya Bomo na Seko, bato balingi kobenga yango—yango “bilanda-landa ya mpamba.” Mpo na nini? Bazali komipesa na mayele na bango moko, kasi na Liloba na Nkolo te. Pe boyebi ete ezali solo.

72 Kotalisama, ndimbola oyo Nzambe azali kopesa Ye moko, ezali nde komonisama na elaka.

73 Ntango mosusu nakoloba yango, mpo na kokómisa yango mwa polele. Ntango Nzambe alobi Liloba, Azali na bosenga ya mobali to mwasi moko te, to moto mosusu te, mpo apesa ndimbola na Yango. Ntango Alobi. . . Ee, bolobaka: “Nzambe alingaki koloba nde boye.” Nzambe, likambo oyo Alingi koloba, Alobaka yango bobele ndenge Alingaki koloba yango. Bomoni?

74 Bongo Alimbolaka Liloba na Ye Ye moko ndenge nini? Na kokokisaka Yango. Biblia elobi: “Mongondo akokumba zemi,” akumbaki zemi. Ezali na bosenga ya ndimbola moko te. Nzambe alobaki: “Tika pole ezala,” pe ezalaki. Ezalaki na bosenga ya ndimbola moko te.

75 Nzambe alobaki lisusu, na mikolo oyo ya suka : “Akosopa Molimo na Ye likolo na mosuni nyonso,” pe Asali yango. Ezali na bosenga ya ndimbola moko te. Ezali bobele na bosenga eyambama, moto oyo akoyamba likambo Nzambe asali. Esengeli na ndimbola moko te. Nzambe alimbolaka Liloba na Ye Ye moko. Nzambe alakaki makambo tozali komona, mokolo na mokolo, ete Akosala yango na mokolo ya suka.

76 Bato ya lelo, lokola ezalaka kala, bazali komipesa na mayele na bango moko. “Mokengeli na ngai alobaki ezali ‘bilanda-landa.’” Kasi Biblia elobaki ekosalema. Yo okomipesa na mayele ya nani?

77 Biblia elakaki na mikolo ya suka ete, “Eleko na lingomba ya Laodikia ekozala na bozui mingi, pe ekozala mpenza na ko- . . . to bakokoka na bango moko, ‘Nazali mozui. Nazali na

bosenga moko te. Nafandi lokola mwasi-mokonzi.” Pe azali mwasi mozui. Pe Alobaki: “Oyebi te ete ozali moto na mawa.” Bongo ezali eleko ya lingomba mobimba, lingomba! “Mpo na lingomba na Laodikia: ozali bolumbu, mokufi miso, mobola, moto na mawa, pe oyebi yango te.” Afandeli bozui na ye, bankoto zomi na bankoto zomi, pe bankoto ya bandimi, bozui ya mokili ezali na maboko na ye, penepene. Soki basangisi yango, lelo oyo, lingomba Katoliko ná ba-Mísioni, elongo, ndenge bazali kosangana, bazali na bozui ya mokili oyo.

<sup>78</sup> Ekólo na biso ezali lisusu ata na mbongo te. Tozali kodefa mbongo ya mpako oyo ekofutama nsima na mbula ntuku minei, ndenge bayebisi ngai, elobami bongo na *Life Line*. Mbongo ya mpako oyo tozali kosalela sikawa, ekofutama nsima na mbula ntuku minei. Nkoko na ngai ya moke, soki Yesu aumeli koya, mbongo ya mpako ye akofuta ntango akokóma na mbula ntuku minei yango nde tozali kosalela sikawa. Tozali kotinda yango mpo na kosunga bikólo mosusu, na ntango ba-Indien na biso pe ba mosusu bazali kokufa na nzala; tozali komeka kosomba bondeko. Basombaka bondeko te. Basombaka moninga te. Te, kasi yango nde tozali kosala. Yango nde lolenge tozali, bazali kofutisa bato mpako na makasi nyonso, mpako, mpako, mpako. Pe niongo ya bitumba bato na politiki bakotisa biso na yango, tokobima na yango te nsima na—na mbula nkama na nkama, nabanzi. Nzoka nde tosengelaki kozala bongo te. Ntina moko mpo na biso kozala bongo ezali te.

<sup>79</sup> Kasi mangomba, yango moko, ekómi na bozui. “Penepene ya bozui ya mokili,” Biblia elobi: “ezali na maboko ya lingomba Katoliko.” Ezali mpo na yango nde Russie abenganaki yango, nde Russie bamboyaki yango. Yango nde ntina mpenza ya kominizme, pamba te oyo lingomba ezalaki koteya, ekesanaki na bato mosusu te.

<sup>80</sup> Ntango tozalaki kuna na Finlande, elenge mobali wana asekwaki. Basoda wana ya Russie bapesaki losáko, pe balobaki: “Tokondima Nzambe oyo akoki kosekwisa bakufi.”

<sup>81</sup> Totongi bibongiseli, ná biteyelo ná—ná bandako, pe tozangi kosala likambo Yesu alobaki na biso tosala, ete, “Boteya Nsango Malamu.” Toluki nde kokotisa mokili na kelasi. Alobaki ata moke te : “Bokotisa bato kelasi; ye oyo akokota kelasi akobika.” Bosengeli kobotama mbala mibale, kotondisama na Molimo. Yango nde ntina tokwei mpenza kokwea, bipai nyonso. Bomoni, tozali na bozui, tozali na yango.

<sup>82</sup> Sikawa nini ekosalema? Ntango lingomba oyo, Likita ya Mangomba ya Mokili, ekosangana, bokoki komona te nani akokamba yango? Bino ba-Methodiste ná ba-Prebisterien, bokoki kososola yango te, ná bino mosusu, ata bino ba-Pentekotiste? Bolobi bokokota na yango te. To bokokota na yango, to bokopanza ebongiseli na bino. Bokosala likambo moko to

mosusu. Ezali mpenza liboso na bino, bosengeli kosala yango. Ezali kosalisa na makasi, elembo na nyama. Pe ezali yango, yango mpenza. Molimo ya bibongiseli na ntembe te (nakoki kotalisa yango polele na Biblia) ezali elembo na nyama. “Azalaki mwasi na pite; azalaki na bana ya basi bandumba.” Pe toyebi yango ezali Solo. Losambo oyo ebongisami, ekesani na Liloba, pe ezali kotelemela Klisto na malako na yango. Makambo nyonso kati nde ezali kotelemela Klisto te, kasi malako na yango, ebongiseli yango ezali kotelemela Klisto, mpo ezali kotelemela Liloba na Nzambe. Lolenge ya ebongiseli nyonso ezali se bongo.

<sup>83</sup> Yango wana, bomoni, pe bozali komipesa na mayele ya moto mosusu, na mayel- . . . na mayele na bango, esika ya komipesa na mayele ya Nzambe, oyo Nzambe alobi mpo na yango. Yango wana ezali mabe. Bilenge mibali bazali kobima na biteyelo ya likindo mpo na kozua boyebi malamumu, bazali kobima na biteyelo wana ya Biblia, ndenge balobaka. Pe ntango mosusu bazali na—bazali na mbela ya Nzambe na mitema na bango. Bazali kobima wana pe batondisami na emoniseli moko, ete, “Moto *songolo* alobaki yango, Eveke *songolo*. Moto *oyo* nde alobaki yango. Moto *mosusu* alobaki yango. Likita ya bato bayokanaki, esengelaki ezala *boye*.”

<sup>84</sup> Oyo moto nani alobi etali ngai te! Yesu alobaki: “Tika ete maloba na bato nyonso ézala lokuta, kasi oyo ya Ngai ézala Solo. Ézala ata maloba na nani, oyo ya Ngai ézala Solo!”

<sup>85</sup> Sikawa tokoyeba Solo ndenge nini? Ntango Biblia elobi ete likambo moko ekosalema, likambo yango ekokokisama, pe esalemi bobele bongo.

<sup>86</sup> Kasi, Biblia elobi: “Mwasi yango azalaki na—na bozui ya mokili; wolo, palata.”

<sup>87</sup> Bongo soki wolo ezali emekeli ya nkita na biso, pe tozali na mbongo te, sikawa likambo nini ekosalema? Likambo nini ekosalema? Boyebi, bazui na ekólo oyo, ba-izini minene oyo, bato na misolo ya wiski pe ya makaya, pe bongo na bongo motindo wana, bakolinga te ete babongala mosolo, nzoka nde likambo moko mpamba oyo tosengeli kosala ekozala nde kodefafa. Pe esika oyo tokoki kodefafa ezali bobele moko mpamba. Pe na ntango wana, tokoteka makoki na biso ya bokulutu. Ya solo. Na bongo bokosala nini? Bino nde bankolo momesano wana. Likambo mosusu oyo bokoki kosala ezali te.

<sup>88</sup> Oh, baninga na ngai, bokanisa te ete ngai. . . Bokoki kokanisa ete nazali na liboma. Kasi ntango mongongo na ngai ekoyokana lisusu te, nsima na liwa, ba-bande oyo ekokoba kobeta, pe bokoyeba ete makambo oyo nálobaki ekokisami. Nakozala moto oyo aleki na boléma ya kozua ngambo oyo nazui, ya kokende kino kotelemela makambo oyo, na—nakozala—nakotelemela Nzambe, nakotelemela makambo nyonso oyo ya Nzambe, soki ngai (soki nazalaki) na libunga kati na makanisi na

ngai pe kati na kobengama na ngai. Likambo yango ekotelemela Nzambe. Kasi nazui ngambo oyo mpo ete námoni yango awa kati na Liloba. Ezali Liloba na Nzambe. Pe na nsima nazali komona kondimisama na yango, kotalisama polele ete ezali Solo. Yango nde ndimbola oyo Nzambe azali kopesa mpo na Liloba na Ye. Ndimbola oyo Nzambe Ye moko apesaka mpo na Liloba na Ye, ezali ndenge Azali kondimisa Yango pe azali kokómisa Yango solo.

<sup>89</sup> Mpo na nini Bafalisai bakufaki miso? Eloko nini ebomaki bango miso mingi boye? Ezali mpo ete baboyaki koyamba emoniseli to kondimisama ya Liloba.

<sup>90</sup> Pe yango nde ntina mangomba ekufi miso lelo, ezali mpo ete baboyi koyamba emoniseli atako ezali kondimisama. Atako Liloba elobi yango, pe emonisami, pe na nsima etalisami polele, bazali ata bongo koboya koyamba Yango.

<sup>91</sup> Yango nde ntina Bayuda, kino lelo, Bayuda bazali koboya koyamba Yango. Okoki koyebisa bango likambo na Klisto te, mpo ete ezipeli ezali naino likolo ya bilongi na bango, bakufi miso.

<sup>92</sup> Pe lingomba, okoki koyebisa bango likambo ya Nsango Malamu mobimba pe ya nguya na Nzambe te, mpo ete nzambe na mokili oyo abomi bango miso liboso na bosolo ya Nzambe, pe bamipesa na mayele na bango moko. Wana basi bazali kokota na losambo pe bazali komikata suki, mpo ete bakengeli na bango bazali koyebisa bango: “Oh, mabe ezali wana te. Mobali wana azali liboma.” Kasi Biblia elobi ete mwasi azali kosala mabe ntango azali kosala bongo, ete Nzambe akoboya koyoka mabondeli na ye. Pe basi mosusu wana bazali lisusu kobakisa nsoni, na koluka komikómisa motei, na ntango wana asali makambo mibale. Biblia elobi ete asengeli kosala yango te, ata moko na makambo wana te. Kasi lingomba oyo ebongisami bakondima makambo wana, bakobulisa mwasi wana pe bakotinda ye kuna. Bazali komipesa na mayele na bango moko!

<sup>93</sup> Liloba na Nzambe moko mpamba oyo etiami mabe, to oyo elimbolami mabe, to Oyo eyambami te, ekokata Moniololo mobimba. “Moto akobika bobele na mapa te, kasi na Maloba nyonso ekobimaka na monoko na Nzambe.”

<sup>94</sup> Mpo na nini ezali kosalema ete bino basi, bozali koyoka ndenge nazali koteya, kotelemela makambo oyo, ya kolata bakupe, kopakola-pakola, pe-pe ya kokata suki mikuse, pe ya makambo nyonso wana, pe na nsima, mbula na mbula ntango nazali kozonga, bofandi bobele wana pe bobele na motindo yango? Ezali mpo ete bozali komipesa na mayele na bino moko na esika ya Liloba na Nkolo.

<sup>95</sup> Pe bino, bakengeli, mpo na nini bozali kopetola ba-losambo na bino te? Mpo ete bozali kolanda bindimeli ya bibongiseli na



bino na esika ya Liloba na Nkolo. Ezali ya solo. Bomipesa na mayele na bino moko te. Ee, bomipesa na mayele na bino moko te, kasi nde na Liloba na Nkolo.

<sup>96</sup> Balingaki te koyamba yango, mpo ete balingaki te koyamba kondimisama na yango. Yesu ayaki na—na Nsango Malamu moko, bobele ndenge Alobaki ete Akoya. Atako mbala mingi . . .

<sup>97</sup> Yoane azuaki mwa mobulu ntango batiaki ye na boloko, pe—pe azalaki kuna . . . Pe ateyaki ete “Masiya azali koya, Asimbi lungu na loboko na Ye; Akopetola etutelo na Ye, pe Akotumba matiti na móto oyo ekufaka te, pe akosangisa masangu na ebombelo.” Molimo na Nzambe oyo ezalaki kobima, oyo ezalaki kotiola uta na Ye lokola liziba. Pe na nsima ntango amonaki Yesu koya, mwa Moto wana ya bopolo pe ya komikitisa, bamonelaki Ye, Asengelaki kokima awa pe kuna mpo na kobatela bomoi na Ye. Kasi, balingaki te . . .

<sup>98</sup> Yoane akokaki kososola yango te, bongo atindaki bayekoli na ye mosusu bakende epai na Yesu, mpo na kotuna Ye soki Azalaki mpenza Ye. Likambo ya nsoni nini boye mpo na Yesu! Nsima na mosakoli yango kotelema wana na mai, na Liloba na Nzambe, alobaki: “Nayebaki Ye, mpamba te namonaki mo—Molimo Mosantu, lokola ebenga, Nzambe kokita uta na Likolo pe kokota kati na Ye, pe nayokaki Mongongo uta na Likolo, koloba: ‘Oyo Azali Mwana na Ngai ya bolingo,’” pe na nsima Yoane alobaki: “Bokende kotuna Ye soki Azali mpenza Ye, to—to, “Tosengeli kozela moto mosusu?”

<sup>99</sup> Nzoka nde Yesu atindelaki ye mwa buku oyo ezali kolobela lolenge ya komikamba na boloko soko moke te, to ya lingomba nini asengelaki kokota te. Kasi Alobaki: “Bofanda mwa moke elongo na biso pe botala malamau makambo oyo ekosalema, pe na nsima bokende kolakisa Yoane makambo oyo bomoni pe bosali,” mpamba te, misala na Ye oyo Azalaki kosala ezalaki kondimisa ete Azalaki Masiya, Mwana na Nzambe. “Esengo na ye oyo Nakozala libaku mpo na ye te.”

<sup>100</sup> Bongo ekómaki libaku mpo na bato ebele. Ezali pete mpenza mpo na bato ebele ete bazua libaku kati na Liloba na Nzambe. Yango—yango ekesani, balingi komipesa na mayele na bango moko. Balingi koyamba Liloba na Nkolo te. Pe bakosengela kolanda bobele nzela oyo—oyo bateyaki bango ete balanda. Pe nzela oyo bateyi bango, mangomba na bango ezali komipesa na yango. Ata soki Nzambe alakaki ete Ako—Akotinda mbula, ete mbula moko ekozala na ntongo, pe soki lingomba elobi ete “Oyo wana ezali bolema,” bakondima lingomba na esika bandima Nzambe. Mpo na nini? Babotami nde na lingomba.

<sup>101</sup> Kasi moto oyo abotami na Nzambe, azali moto ya momboto na Nzambe. Pe momboto na Nzambe ezali nde Liloba na Nzambe, pe akobika bobele na Yango. Yango nde Bomoi na ye.

<sup>102</sup> Bongo, bamipesaki na mayele na bango moko, kasi balingaki komipesa na Liloba na Nzambe te. Bayebaki yango malamamu. Ezalaki kati na Makomi. Babengaki yango “molimo mabe,” Mobali wana. Mpo na nini boye? Banganganzambe na bango balobaki: “Moto nyonso oyo akokende koyoka Mobali wana ntango azali koteya, bakobengana ye na eyanganelo.”

<sup>103</sup> Na ntango moko boye, mobali moko oyo azalaki mokufi miso abikisamaki, na Yesu. Ata baboti na ye, bazalaki na esengo monene mpo na lobiko na ye, kasi bazalaki kobanga koloba ete Yesu moto abikisaki ye. Iyo.

Alobaki—alobaki: “Oyo mwana na yo?”

Alobaki: “Iyo.”

Alobaki: “Nani abikisi ye?”

<sup>104</sup> Alobaki: “Ngai—ngai nayebi te.” Alobaki: “Botuna ye, azali mokóló. Ye, akoki koloba ye moko.”

<sup>105</sup> Mpamba te, esilaki kolobama ete “Moto nyonso oyo akomipesa na mayele oyo ya Ye, ya Klisto,” na esika na mayele na bango, “bakobengana ye na lingomba na bango.” Sikawa ezali bongo te? Natuni bino motuna ya polele. [Losambo balobi: “Amen.”—N.D.E.] Ya solo. Ezali koyemama ndenge moko. Ata soki Nzambe asali nini, esengeli ete ekokana na mayele na bango, kasi na oyo Nzambe azali kondimisa ete ezali Solo te. Bongo, mobali wana azalaki na eyano.

Alobaki: “Nani abikisi yo?”

Alobaki: “Oyo babengaka Klisto ya Nazaleté.”

Alobaki: “Azali moto na masumu. Toyebi epai Auti te.”

<sup>106</sup> Alobaki: “Oyo ezali likambo ya kokamwa. Bino bosengelaki kozala bakambi ya ntango oyo. Pe mobali moko ye oyo afungoli miso na ngai, likambo moko oyo naino ésálémá te banda mokili ésálémá, nzoka nde bozali koloba ete boyebi epai Auti te.” Hólálá!

<sup>107</sup> Mpo na nini? Bazalaki komipesa na mayele na bango moko na esika ya Liloba na Nkolo. Mpamba te, Yisaya alobaki: “Bakufi miso bakomona, motengumi akopumbwa lokola mboloko, bisobe ekoganga na esengo.” Kasi bomoni, bamipesaki na mayele na bango moko, na Liloba na Nzambe te; na mimesano na bango moko oyo basalaki.

<sup>108</sup> Sikawa botala, mangomba ya lelo ezali kosala bobele bongo. Bamisaleli molongo moko oyo eleki likolo ya lisosoli ya makambo, na mimesano na bango ya bibongiseli. Bazali na lisosoli moko oyo eleki likolo, na lolenge ete balingi te moto mosusu asimba yango, ete moto akokota bobele soki azali mondimi ya etonga na bango.

<sup>109</sup> Koyebisa ngai ndenge mosusu te; nafandaka na Tucson, Arizona. Nakomaki kuna eleki mbula misato, nakutanaki na

likita ya mangomba, pe nalobaki: “Nayei mpo na kobanda losambo te. Nayei nde kosangana na bino. Nayei kosunga bino. Ngai nazali ntóma, mopalanganisi ya Nsango Malamu, yango nde nazali kosala.”

Balobaki: “Oyei kofanda awa mpo na kobanda losambo?”

<sup>110</sup> Nalobaki: “Te, misie. Nayei awa . . . Soki nazali na mposa ya losambo, nazali na moko na Indiana.” Nalobaki: “Nayei awa nde mpo ete Nkolo akambi ngai ete naya awa, uta na emononeli. Nakofanda awa mpo na mwa ntango, bobele soki Akambi ngai epai mosusu, kasi nayei mpo na kobanda losambo te. Nayei mpo na kosunga bino, bandeko.”

<sup>111</sup> Likambo yango eleki mbula misato. Naino babengi ngai ata na esika moko te. Mpo na nini? Mpo ete bobele na nsima wana basanganaki, pe balobaki ete soki moto moko abengi ngai na eteyelo na ye, bakolongola motei yango kati na lisanga. Bomoni? Mpo na nini? Bazali komipesa na mayele na bango moko! Na ntembe te, bato ya maloba wana, bamisaleli lisosoli na bango moko ya makambo.

<sup>112</sup> Soki okomi nkombo na yo na kayé na biso te, oko . . . obungi. Motei moko alobelaki ngai bongo. “Oh,” bolobaka ete “oyo wana ezali nde mwa mokosi moko boye.” Azalaki Pentekotiste.

<sup>113</sup> Ngai ná Jack Moore tofandaki wana pe tozalaki koyoka ye, na Dallas, Texas. Alobaki ete “Asengelaki kolongola moto moko na buku na bango.”

Nalobaki: “Mpo na nini?”

“Mpo ete ayanganaki na yo.”

Nalobaki: “Ee, longola ye.”

Alobaki: “Ee, na ntango wana abungi.”

Nalobaki: “Abungi?”

“Kasi,” alobaki: “soki nkombo na ye ezali na kayé te!”

<sup>114</sup> Nalobaki: “Olingi koloba ete yo nde moyangeli mokonzi pe ozali kondima yango?”

Alobaki: “Ezali solo.”

<sup>115</sup> Nalobaki: “Kata lisolo yango, misie. Yo, yo . . . Yango ezali ngolu na Nzambe te, oyo wana—oyo wana, omoni.”

<sup>116</sup> “Mpamba te biso nyonso tobatisami na Nzoto moko kati na Molimo moko, pe tokómi binama na Nzoto yango.” Elembo wana olati etali ngai te, ezali na ntina te mpo na ngai. Na ntembe te okokóma Moklisto nde na nzela na mbotama, pe nzela bobele moko yango wana. Nzela bobele moko ya kokóma mpo na yo yango wana; kasi na kosangana te, na nzela na bindimeli te, na kopusa eloko *oyo* te, to na kotanga eloko *oyo* te, to na eloko mosusu te, na koyekola ya likindo te. Okómi Moklisto nde ntango obotami lisusu, pe okoki kobotama lisusu te bobele soki óponámákí liboso ete okobotama lisusu. “Mpamba te, moto

akoki koya epai na Ngai te bobele soki Tata na Ngai abendi ye, pe baoyo nyonso Tata apésá Ngai bakoya.” Amen. “Nakosekwisa ye na mokolo ya suka.”

117 Biteyelo minene ya Biblia, ya kombo, oyo tozali na yango, bazali koloba, bazali komipesa na boyebi na bango moko. Hólálá. Bango, ata soki Liloba elobi nini, bakoki komilimbolela yango polele mpenza, oh, na ndenge na bango moko, bakomindimisa yango bango moko, pe bakotinda bato na etonga na bango ete bandima yango, ete “Mikolo na bikamwa esilá koleka. Mosakoli, basakoli, bantoma bazali te. Makabo ya lobiko na nzoto kouta na Nzambe ezali te, pe bongo na bongo. Makambo nyonso wana esukaki na ntango ya Biblia.” Bakoki komindimisa yango bango moko.

118 Boyebi, Biblia elobi: “Okoki kondima lokuta pe obungi mpo na yango.” Bomoni, ezali mpenza Solo. Bazali komibongisa, ata Liloba na Nzambe elobi nini, bazali komipesa na mayele na bango moko. Bango, bango bazali komipesa na yango, bazali kondima yango, bazali kokanisa ete yango nde Solo. Okoki kokoba kondima lokuta, mbala na mbala mbala na mbala, kino yango ekómi Solo mpo na yo. Ezali solo.

119 Kasi ndenge nini tokoyeba soki ezali Solo to te? Nzambe atalisaka Solo na yango polele, mpo ete ezali kati na Liloba na Ye pe Atatolaka Yango. Ye Moko Apesaka ndimbola na Yango.

120 Basalaka mpenza ndenge nini mpo na kokóma kuna? Basalaka yango na zebi na bango, na mayele na bango ya mokanda, na boyebi na bango ya makambo oyo bazui na ba—na ba-lípolóme wana ya líkindo, pe bongo na bongo, oyo bauti na yango na likindo moko boye epai bayekoli makambo oyo.

121 Kasi botala, baninga na ngai, boyoka. Na esika moko te kati na Biblia basengi biso ete tososola. Basengi biso te ete tososola Yango. Basengi biso ete tondima Yango. Kondima Yango na nini? Na kondima. Soki ososoli Yango, na ntango wana ezali kokómisa kondima na yo mpamba. Okoki kososola Yango te, kasi ondimi Yango kaka. Soki nakokaki kososola Nzambe, nalingaki kozala na bosenga ya kondima Nzambe te. Nazali kososola Nzambe te. Moto moko asosolaka Nzambe te. Nakoki kososola Liloba na Nzambe te, kasi nayambi Yango. Nandimi Yango. Basengi ngai nasosola Yango te.

122 Ngai naino, nakende na likindo moko te, mayele nyonso wana oyo moto ayebi likolo na Yango. Nayebi bobele oyo Biblia elobi mpo na Yango, ete “Yesu Klisto azali ndenge moko lobi, lelo, pe libela,” pe nazali kotalela Ye bobele na molongo wana. Nayebi ete Alakaki oyo Akosala na mikolo oyo, nazali kotalela Ye ete Asala yango pe Asali yango. Ya solo. Alakaki ngolu, nazali kotalela yango pe nayambi yango. Alakaki lobiko na nzoto, nandimi yango pe nayambi yango, pe nazui yango.

123 Sikawa, nalingi kozua ntango na bino mingi te, kasi nalingi kotuna bino bobele likambo moko soki bokolinga kozala na motema molai elongo na ngai mwa moke, mpo na kotala bamoko kati na baoyo bamipesaki na mayele na bango moko te; bato mosusu kati na Biblia, mwa ndambo, baoyo bamipesaki na mayele na bango moko te, baoyo batalaki mayele ya makambo oyo eleko na bango ezalaki na yango te.

124 Tokamata, ndakisa, Nowa. Nowa abikaki na eleko moko ya misala minene ya boluki-luki ya zebi. Na mikolo na Nowa, na ntembe te batongaki ba-piramíde, oyo bakoki lisusu kozongela kosala lelo te. Tozali na biloko oyo esengeli mpo na kosala yango te, biloko oyo esengeli mpo na kotombola mabanga minene-minene wana likolo kuna. Bakokoka kosala yango lelo oyo te. Na ntango wana, bazalaki na nkisi moko oyo bazalaki kotia na langi po bilamba ebatela lolenge na yango kino lelo. Bazalaki na nkisi moko ya mai mpo na kokausa bibembe; tokokoka kosala moko te lelo oyo, soki esengelaki ete tosala. Bisó. . . misala ya kotonga ebele tobungisi yango. Eleko oyo abikaki kati na yango, na eleko ya mayele mingi, ya zebi.

125 Yesu alobelaki yango, ete bobele eleko ya ndenge wana ekozonga lisusu liboso na bozongi na Ye: “Mpamba te ndenge esalemaki na mikolo na Nowa.” Sikawa bobele mi mpo na kondima yango, boye te? [Losambo balobi: “Amen.”—N.D.E.] Bondimi ete Yesu moto alobaki yango? [“Amen.”] Bondimi ete tozongi na eleko yango? [“Amen.”] Nzoka nde ezali na kati ya Buku na Luka, mokapo ya 17 pe nzela ya 29.

126 Sikawa na Luka 17:30, Alobaki: “Ndenge esalemaki na mikolo na Lota, ntango Mwanje na Nkolo. . .”

127 Nzoka nde, Azalaki kotanga bobele Biblia oyo tozali na yango oyo. Pe ntango Ye. . . Bozonga na nsima mpo na komona lolenge ya eleko oyo ezalaki liboso ete mbula na Nowa ebeta. Bozonga na nsima mpo na komona lolenge ya eleko oyo ezalaki liboso ete mokili ebebisama, na mikolo na Lota. Botala makambo oyo ezalaki kuna, pe bokomona eloko nini Yesu azalaki kolobela.

128 “Na mikolo na Nowa, bato bazalaki kolia, komela, kobala, pe kobalisa bana na bango; bayebaki eloko te kino Nowa akotaki na masuwa, pe mpela eyaki kosilisa bango nyonso.”

129 Na mikolo na Lota, bobele liboso ete mokili. . . ete móto ezikisa mokili ya Mabota, bato na Sodoma, ba-homosexuel bazalaki, libebi, pe nyonso kati na mokili. Ya monene. . . Ezalaki Los Angeles ya mikolo wana; bobele Los Angeles ya mikolo wana te, kasi Etats Unis; bobele Etats Unis te, kasi mokili. Na ntembe te ebebaki mpenza! Mibali babungisaki lolenge na bango ya bomoi ya ebandeli, pe mayele ya bomoto oyo epesamelaki bango na biyokeli, babebisamaki na molimo mabe oyo ebongolaki lolenge nyonso ya bomoi na bango, pe bazalaki na milimo mabe. Soki yango ezali makambo ya mikolo na Nowa te, nayebi te soki

ekozala nini, pe na ntango na Lota, nalingaki koloba. Na mikolo na Nowa, lokola, bazalaki kolia, komela, kobala, kobalisa bana na bango, ba-tribinále ya koboma mabala ezalaki kotonda, pe nyonso, ezalaki mpenza bongo.

<sup>130</sup> Kasi, bobosana te ete, liboso mokili ebebisama, Abalayama atindamaki na mokili pe azuaki elaka ete akozua mwana. Pe Abalayama akutanaki na Nzambe mbala mingi, lokola elilingi ya lingomba oyo ekutani na Nzambe. Kasi bobele liboso ya kobebisama pe ya bozongi ya mwana na elaka, to kutu, boyei na ye, boyei na mwana oyo alakamaki, Nzambe akitaki pe Amimonisaki na mosuni na moto, kati na moto, bato misato. Bayaki epai na Lota; bayaki liboso epai na Abalayama, pe bafandaki. Pe nkombo na Abalayama esilaki kobongwama, elongwaki Abalama pe ekómaki Abalayama; Salai ekómaki Sala.

<sup>131</sup> Pe Mobali wana, oyo azalaki koloba, Elohim, ntango Ayaki kosolola na ye, Alobaki nini? Alobaki: “Mwasi na yo Sala, azali wapi?”

Alobaki: “Azali kuna na hema, na nsima na Yo.”

<sup>132</sup> Alobaki: “Nakoya kotala yo na eleko ya bomoi.” Pe ye asekaki kuna na hema, na nsima na Ye. Pe Alobaki: “Mpo na nini Sala aseki?” Bomoni? Bongo Alingaki koboma Sala bobele wana, mpo ete asekaki Liloba na Ye; kasi Akokaki kosala yango te, mpo ete Sala azalaki eteni na Abalayama.

<sup>133</sup> Pe lelo oyo, Yesu alobaki na Luka mokapo ya 17 pe na nzela ya 30, “Ndenge esalemaki na mikolo na Lota, ekozala pe bongo na suka na ntango, ntango Mwana na moto. . .”

<sup>134</sup> Sikawa bobosana te ete, “Mwana na moto” elingi koloba *mosakoli*. Yawe abengaki Ezekiele “mwana na moto.” Yesu ayaki na nkombo misato: Mwana na moto, Mwana na Dawidi, Mwana na Nzambe. Ye moko Azalaki komibenga “Mwana na moto” mpo ete bato bakoka kososola, mpamba te Azalaki Mosakoli wana oyo Yawe Nzambe alingaki kotemisa.

<sup>135</sup> Sikawa botala, na nsima Alakaki nini? Mwana na moto Akomimonisa lisusu, bobele liboso na ntango wana, liboso na móto. Pe yango ezalaki elembo ya suka oyo Abalayama amonaki liboso na boyei ya mwana na elaka; pe azongaki elenge, pe mwasi na ye akómaki elenge mwasi. Liboso. . . Sikawa botala, Makomi elobi yango mpenza-mpenza, sikawa tosengeli kozela yango.

<sup>136</sup> Pe na bongo, soki tozali komona mokili kati na libebi pe makambo oyo ezali kati na yango lelo oyo, pe lolenge ezali kosalema, na bongo ndenge nini tokoki koloba ete eteni wana ezali solo, pe tózanga koloba ete oyo pe ezali solo? Mpo ete, moto moko, bozali komipesa na mayele na bango, kasi na mayele ya Mokonzi na Bomoi te, oyo Azalaki Moto wana elongo na bango kuna na ekuke ya Sodoma. Sikawa, tozali komona, tozali komipesa na mayele na biso moko te.

<sup>137</sup> Nowa amipesaki na mayele na ye moko te. Ezalaki eleko moko monene ya zebi, kasi amipesaki te na mayele na ye moko oyo azalaki na yango ya eleko na ye. Kasi amipesaki na elaka na Nzambe, pe asalaki na nguya na Nzambe, alengelaki masuwa mpo na kobikisa libota na ye. Nzoka nde, ekesanaki mpenza na bomoto; mai ezalaki kuna na likolo te, ezaláká naino kuna te. Kasi ye ayebaki ete soki Nzambe alobaki ete mai ekozala kuna, ekozala kuna solo. Na bongo amipesaki na mayele na ye moko te, kasi asalaki nde na kondima, yengebene na Liloba na Nzambe oyo elakami. Molimo akambaki ye, pe asalaki yango.

<sup>138</sup> Abalayama, amipesaki na mayele na ye te na ntina na bomoi ya moto. Abalaki mwasi na ye na mbula penepene zomi na nsambo. Pe ye oyo, akómaki na mbula ntuku nsambo na mitano, pe mwasi na ye azalaki na yango ntuku motoba na mitano, mobali na ye alekaki ye na mbula zomi. Kasi Abalayama amipesaki na mayele na ye moko te, ntango Nzambe alobaki ete Akopesa ye mwana na nzela na Sara. Kasi azalaki kobenga makambo nyonso, ndanga nyonso ya zebi oyo ekesanaki na Liloba na Nzambe, boyebi nyonso oyo ezalaki libanda na Liloba na Nzambe, lokola ete ezalaki te. Pe apesaki Nzambe lokumu, azalaki makasi, apesaki Ye lokumu. Atalaki nzoto na ye moko ata kotala te, to Sara oyo nzoto na ye esilaki kokufa, to—to nzoto na ye moko. Atalaki ata eloko moko te, kasi amipesaki na elaka na Nzambe. Amipesaki na mayele na ye moko te. Amipesaki na mabanzo te.

<sup>139</sup> “Tala,” bozali koloba: “Ndeko Branham, ezali komonana ete Nzambe azali kobikisa babeli te, tozali na minganga ebele ya malamú.”

<sup>140</sup> Biblia elobi: “Tobwaka mabanzo.” Tobanzaka te. Kondima ebanzaka te. Kondima endimaka pe eyambaka. Botala.

<sup>141</sup> Kasi andimaki na esika ete ázanga kondima; pe abengaki makambo oyo ezalaki te, lokola ete ezalaki, oyo na ntembe te ekesanaki na mabanzo nyonso. Kasi abanzaki-banzaki te. Andimaki yango kaka. Mabanzo oyo ekokaki kotalisa polele ete bebé yango akobotama ezalaki te. Mwasi yango alekisaki ntango ya kobota penepene mbula ntuku mibale, pe nzoto na ye mobali toloba ekufaki mpenza kokufa. Pe ntango akómaki na mbula mokama, mbula ntuku mibale na mitano na nsima, azalaki kokoba kopesa Nzambe lokumu, likambo oyo ekesanaki mobimba na lolenge nyonso ya mayele. Kasi na kondima, ayebaki ete Nzambe akobatela Liloba na Ye. Amipesaki na mayele na ye moko te.

<sup>142</sup> Nini elingaki kosalema soki Mose amipesaki na mayele na ye moko, ntango Nzambe ayebisaki ye ete alingaki—alingaki kokamata Faló . . . to bana na Yisalaele na maboko na Faló? Nini elingaki kosalema soki amipesaki na mayele na ye moko, ntango azalaki wana pembeni na Likonzi na Móto, ntango Nzambe

alobaki: “Kende pe Ngai nakozala elongo na yo”? Nini elingaki kosalema soki amipesaki na mayele na ye moko ntango amemaki bango na Mbu Motane, pe bazalaki kuna pembeni na mai, wana Nzambe alakaki bango mboka na elaka? Nini elingaki kosalema soki amipesaki na mayele na ye moko: “Nakosala ndenge nini mpo nakatisa kuna? Tozali na ntango ya kotonga gbagba te. Mapinga na basoda yango oyo na nsima na biso awa. Bangomba yango oyo ngambo na ngambo. Mai pe yango oyo liboso na biso, Mbu Motane?”

<sup>143</sup> Bongo, soki amipesaki na mayele na ye moko, alingaki kotombola maboko likolo pe kopota mbango, komibwaka na makolo na Falo, koloba: “Falo, limbisa ngai, nasali libunga.”

<sup>144</sup> Kasi amipesaki na mayele na ye moko te. Kasi abondelaki, pe Nzambe ayebisaki ye ete akende liboso, pe mbu emifungolaki, likambo moko oyo ekesanaki na mabanzo nyonso. Kasi amipesaki na mayele na ye moko te.

<sup>145</sup> Nini elingaki kosalema soki Yosua, ntango akendeki kuna elongo na bibongiseli zomi, akendeki kuna pe amonaki mboka wana oyo Nzambe alakaki, pe azongaki elongo na bango na koloba: “Sikawa bozela mwa moke. Ya solo. Tozali lokola makelele liboso na bango. Bazalaki bilombe. Ndenge nini tokolonga bango? Tozali ata na mipanga te; bobele biloko oyo tolomotaki oyo. Ndenge nini tokokota kuna mpo na kokamata mboka yango? Tala, ekoki kosalema soko moke te. Baleki biso na ebele, bato ntuku mitano mpo na moto moko. Bazali basoda oyo bayekoli, pe biso tozali bobele mwa etonga ya babokoli bibwele pe ya bapoti mabele ya Ezipito. Ndenge nini? Tozali ata na nguba to eloko moko te, tokokamata yango ndenge nini?”

<sup>146</sup> Tala, mayele ekokaki na ntembe te kotalisa polele ete bakokaki kokamata yango te. Ata soda nyonso lokola ye, to Mose, akokaki te komipesa na mayele na ye moko. Kasi mayele na bango moko, bamipesaki na yango te. Kasi bayebaki ete Nzambe alobaki: “Napesi bino mboka wana. Bokende kokamata yango!”

<sup>147</sup> Omipesa na mayele na yo moko te. Soki omipesi na mayele na yo moko lelo oyo wana ozali na bokono, ntango mosusu ofandi na kiti ya bibosono, ozali kobunda na kanser, ozali kobunda na mpasi ya motema, pe monganga ayebisi yo ete okokufa, soki omipesi na mayele wana, okokufa. Kasi komipesa na mayele wana te. Ata moke te.

<sup>148</sup> Toloba nini mpo na bitutu ya Yeliko, oyo balobaka ete bakokaki kosala course ya makalo likolo na yango, bitutu wana ya minene-minene? Nzambe alobaki: “Bokende kuna pe botambola zongazonga na yango mbala ebele, pe bokobeta kelelo, pe bino nyonso bokoganga makasi, pe etutu yango ekobukana.” Ee, yango ekokaki kozala na ntembe te bolema mpo na makanisi ya bomoto. Kasi Yosua, ayebaki monene ya bitutu wana, mpo ete atongaki bitutu mingi kuna na Ezipito. Ayebaki



ciment boni ekotaki na kati, ayebaki makasi na yango, mpo na komema makalo oyo ezalaki kopota likolo, pe ata bandako oyo etongamaki likolo na yango. Kasi amipesaki na mayele na ye moko te. Andimaki ete oyo Nzambe alobaki ezalaki solo, pe atosaki Liloba na Ye, pe bitutu ekweyaki. Amipesaki na mayele na ye moko te.

<sup>149</sup> Nini elingaki kosalema soki, ntango azalaki kobunda, pe, ndenge nateyaki yango lomingo eleki, pe moi elingaki kolala, ná banguna oyo bapanzanaki. Na butu wana balingaki kosangana pe balingaki koya na bato mosusu, pe balingaki koboma bato na ye ebele. Bongo nini elingaki kosalema soki alobaki: “Nazali na bosenga ya pole ya moi. Nasengeli na moi lisusu. Ee, sikawa bozela mwa moke. Nzambe apesaki motindo, pe moi ezali kobaluka, na bongo, mabele ezali kobaluka. Sikawa totala, soki nakokaki koloba na mabele ete etelema. . . Ntango mosusu soki mabele etelema sikawa, ekobungisa nguya na yango ya gravitasió, nakokweya?”

<sup>150</sup> Ye ayokaki mayele na ye te. Likambo moko mpamba oyo alobaki, ezalaki: “Moi telema nye; pe yo sanza, tikala epai ozali,” pe etosaki ye. Amipesaki na mayele na ye moko te. Kasi amipesaki na elaka na Nzambe: “Ngai napesi yo mboka wana; kende kokamata yango.”

<sup>151</sup> Apesaki yo elaka ya Molimo Mosantu. Okoki kozua Yango kati na likita oyo. Okoki kozua Yango sikawa.

<sup>152</sup> Komipesa te na: “Boyebi, nalembi. Nazali koyebisa yo, naliaki bilei ya mpokwa mingi. Ngai—ngai—ngai nakolinga te ete John amona ngai kosala likambo oyo.” Oh, mawa! Ozali komipesa na mayele na yo moko.

<sup>153</sup> “Elaka ezali mpo na bino, mpo na bana na bana na bino, na bango nyonso bazali mosika, baoyo Nkolo Nzambe na biso akobianga.”

<sup>154</sup> “Monganga alobi ete nakokufa. Atali-tali ngai, pe alobi ete nazali na kanser wana, nazali na oyo, to soki nini mosusu. Nasengeli kokufa.” Komipesa na mayele wana te. Nzambe azali Nkolo Nzambe na yo Oyo Abikisaka malali na yo nyonso. Boye komipesa na mayele wana te, na mayele na moto moko te. Mipesa nde na mayele na Nzambe.

<sup>155</sup> Tokoloba nini mpo na Samson, kuna na esobe, ntango Bafilistia, bato nkoto bayaki likolo na ye? Pe azalaki wana, mwa elenge, ná suki elingama, azalaki molai penepene *boye*. Ye azalaki te; ee, ayebaki kosalela mopanga te, mpo ete ayebaki te; ayekolaki eloko moko te, na makambo ya basoda. Azalaki lokola mwasi moko boye ná suki elingama, ná mabokeya suki nsambo oyo ekiti, bebé ya mama, atelemaki wana, pe Bafilistia nkoto bango oyo bakómi. Ee, na maboko asimbacki eloko te. Atalaki na nse, pe azuaki mokuwa moko ya kala oyo ekómaki pembe, ya mbanga na mpunda, pe alokotaki yango.

<sup>156</sup> Bongo alobaki: “Tokotala, boye, na *oyo* nakosala na yango eloko te, mpo ete bikoti na bango ya bibende oyo balati na motó ezali. . . Bafilistia yango, basoda yango nyonso, bango nyonso bazali na makonga. Bango nyonso balati ebende na ntolo. Pe bikoti na bango ya bibende, moko na moko, ezali na bozito ya livre soko zomi na mitano [7 kg], bazali bingambe, bango nyonso. Ee, soki nabamboli mokuwa na mbanga ya mpunda oyo na moko na bikoti ya bibende wana, ee, ekopanzana biteni-biteni. Yango mpenza.”?

<sup>157</sup> Amipesaki na mayele na ye moko te. Akamataki bobele eloko oyo asimbacki, pe abandaki kobeta Bafilistia. Pe nsima na ye koboma bango nkoto, asimbacki mbanga yango bobele na loboko. Amen.

<sup>158</sup> Oyo bato na likindo bazali koloba etali ngai te, bomipesa na yango te. Bomipesa nde na Liloba na Nzambe: “Yesu Klisto motindo moko lobi, lelo, pe libela.” Na ntembe te, andimaki yango.

<sup>159</sup> Nini elingaki kosalema soki Dawidi ayokaki malakisi ya likindo ya Sams- . . . ya Saulo? Goliat atelemaki wana pe azalaki komikumisa, pe bato nyonso bazalaki kobanga ye; Saulo, oyo alekaki bato nyonso ya mapinga na molai. Goliat alobaki: “Moto moko abima awa pe aya kobunda na ngai. Ezali na ntina te ete—ete biso nyonso tokufa. Soki ngai nabomi yo, na ntango wana bokozala baombo na biso. Pe soki yo obomi ngai, malam, tokozala baombo na bino,” mpo ete ye alekaki ye na makasi. Yango nde lolenge zabolo alingaka kosala, ntango asimbi makambo na ye nyonso ya likindo, ná bango nyonso, ntango azali komitalisa, bomoni.

<sup>160</sup> Elenge ya mpiko wana Dawidi, azalaki kotambola kuna, ná eteni ya mposo ya mpate na mokongo; azalaki motane, mapeka ekweya, mwa moto ya bozito ya livre soko mokama, to mokama na zomi [45 to 49 kg] Alobaki: “Bolingi koyebisa ngai ete basoda na Nzambe na bomoi, oyo bakatami ngenga mpo na boyokani, bakozala wana pe bakotika esute ya Mofilistia wana kobeta ntembe na basoda na Nzambe na bomoi?”

<sup>161</sup> Saulo alobaki: “Elenge mobali, yaka.” Alobaki: “Nasepeli na mpiko na yo, kasi mikolo na bikamwa esíla koleka. Bisó tozali na makambo ya ndenge wana te, omoni. Pe nakoyebisa yo likambo moko, kalati nini ya mondimi okoki kolakisa ngai, omoni? Ozali ata na bibundeli te. Ozali na eloko mosusu te soki bobele bilingongo oyo osimbi wana. Omoni? Ozali na lípolome ya filozofi te, to lípolome ya droit te. Okosala ndenge nini? Tala, mobali wana azali mobundi. Tala, azali na lípolome na ye ya likindo, azali na lípolome ya droit, ya filozofi, pe soko nini mosusu. Tala, azali na mápolomi ebele, akoki kotondisa yango na etutu mobimba. Bongo yo nde nani? Mobateli na mpate.”

162 Alobaki: “Kasi nalingi koyebisa yo likambo moko.” Alobaki: “Oyebi likambo?” Alobaki: “Nazalaki koleisa bampate ya tata na ngai kuna, pe,” alobaki: “nkosi ayaki kokanga moko, pe akimaki na yango. Pe oyebi, nakamataki mwa bilingongo oyo pe nalandaki ye, pe nabwakaki ye na nse. Nalongolaki mwa—mwana na mpate na monoko na ye, pe na ntango yango atombokelaki ngai. Nakamataki bobele mbeli na ngai pe nabomaki ye.” Alobaki: “Nazongaki. Pe tala ngombolo ayaki, alandaki mpate yango, akangaki yango pe akimaki na yango. Nabomaki yango, lokola.” Alobaki: “Sikawa Nzambe oyo... Lípólome na ngai ya filozofi te, mayele na ngai moko te. Nakoki kolimbolela yo ndenge nasalaki yango te. Nayebi ndenge likambo yango esalemaki te. Kasi Nzambe oyo,” amen, “Nzambe oyo abikisaki ngai na manzaka na ngombolo pe ya nkosi, koleka boni Akobikisa ngai na maboko na esute ya Mofilistia oyo!”

163 Eveke, Saulo, alobaki: “Oyebi, nandimi ete ozali na mbela, elenge mobali. Nazali koyebisa yo, soki oyei awa, nakolakisa yo ndenge ya kobunda etumba, omoni. Pe nazali koyebisa yo, ngai nazali—ngai nazali molakisi, bongo lata bibundeli na ngai. Nalingi kolatisa yo.” Dawidi atelemaki wana, pe bapesaki ye lípólome ya filozofi, ya droit, pe nyonso wana, pe—pe mwa elenge wana akokaki ata koningana te. Ayebaki ndenge na yango te.

164 Alobaki: “Ngai namesana na yango te. Kazaka ya mangomba oyo ekoi na ngai te. Bolongola yango. Botika ngai nakende na eloko oyo Nzambe apesaki ngai mpo ete esunga ngai.” Elingi koloba kondima kati na nguya na Nzambe. Pe a—amipesaki na mayele na ye moko te. Amipesaki na oyo moto mosusu alobaki te. Amipesaki na kondima. Mpamba te, ayebaki ete soki Nzambe abikisaki ye na manzaka na ngombolo, koleka boni Akobikisa ye epai na Mofilistia oyo!

165 Ee, soki Nzambe alingaki yo mingi mpo na kobimisa yo kati na masumu pe kotondisa yo na Molimo Mosantu, nini ezwi bino ba-bilemba oyo, na ekólo mobimba, bongo koleka boni Akobikisa bino te na mpasi na bino, mpo ete Alakaki ete Akosala yango? Liloba na Nzambe elobi bongo. Akosala yango. Na ntembe te, Abikisaki ye na maboko na ye.

166 Oh, moko na moko na basakoli, nini elingaki kosalema soki bamipesaki na mayele na bango moko, ya eleko na bango? Mbele balingaki kokende soko moke te epai na banganganzambe pe banganganzambe bakonzi, pe kobenga bango “Bitutu ya pembe” te pe nyonso mosusu. Mbele balingaki kosakola mabe mpo na bango te. Mbele balingaki kozala lokola basakoli ya mikolo oyo, balingaki kondima yango, balingaki kolata bilamba kitoko, pe balingaki kofanda na ndako ya bakonzi.

167 Nini elingaki kosalema soki Yoane amipesaki na mayele na ye moko? Kasi akendeki mbala moko.

168 Balobaki: “Sikawa, zela mwa moke, Yoane, komeka koteya likolo na *Libala Pe Koboma Libala* te.”

169 Akendeki mbala moko liboso na Erode pe alobaki: “Mibeko epesi yo nzela te kozua mwasi oyo.” Iyo, misie.

Balobaki: “Ee, oyebi soki azali nani? Azali moko- . . .”

“Azala ata nani etali ngai te.” Amipesaki te.

170 Balobaki: “Kasi oyebi ete ozangi koyeba makambo mingi. Ozali awa moto ya lisobe. Lingomba ekolinga koyamba yo te, soki obandi kosala bongo.” Epai na ye makambo ya mangomba ezalaki na ntina te. Amipesaki na mayele na ye moko te, kasi na mayele na Nzambe. Solo mpenza.

171 Mobali moko azalaki oyo amipesaki mpenza na mayele na ye moko, pe nkombo na ye ezalaki Yuda Mokeliota. Oh, ye . . . Ngai—ngai nazali komona te mpo na nini asalaki bongo. Atambolaki elongo na Klisto, miso na miso, bobele ndenge Ewa asalaki na ebandeli. Amonaki kondimisama, atalaki Nzambe na elongi, ndenge Ewa asalaki yango na malili ya mpokwa. Ewa atalaki Klisto, na malili ya mpokwa, kati na elanga. Pe Yuda afandaki na malili ya mpokwa, kati na elanga na Getsemani pe na bisika ebele, pe atalaki bobele Klisto yango; ayokaki Ye ntango azalaki koteya, Azalaki komitalisa polele na nzela na Liloba, kondimisa ete Azalaki mosakoli wana oyo Mose alobaki ete Akotemisama. Pe Alobelaki bango na Makomi, Nani Ye azalaki, pe na bolai nyonso. Bamonaki Nzambe kotalisa yango polele, ete Azalaki mpenza Ye, pe na nsima amipesaki na mayele na ye moko.

172 Ndenge nini akokaki kosala likambo ya boye? Ezali mpo ete eloko moko te ezalaki kati na ye, na ebandeli. Azalaki momboto oyo ezuaki zemi te. Azalaki mwana na libebi, abotamaki na libebi, azongaki na libebi. Sikawa totala. Kasi akendeki, pe ntango mosusu amisalelaki likanisi moko boye na mayele na ye. Ntango mosusu azalaki kokanisa ete Yesu . . . Azalaki kopesa Ye limemia mingi: “Boye, boyebi, nakoki koteka Ye na mbongo ya bibende ntuku misato. Pe soki nasali bongo, nakozua mbongo, pe nakoki kosalela yango eloko moko boye. Pe Ye azali na makoki ya komibikisa Ye moko.” Bomoni, azalaki koyeba te, yengebene na Makomi, ete abotamaki nde mpo na kosala mosala wana.

173 Ata pe bato ya lelo oyo bazali koyeba te motindo oyo bazuami kati na yango. Lingomba oyo ya Laodikia etindami kozala na motindo wana, ya kotia Klisto libanda. Pe Ye azali kobeta, koluka ete Azonga na kati. [Ndeko Branham abeti mbala mitano likolo na eteyelo—N.D.E.] Kasi boyokani ata moko te, na esika moko. Azali sikawa kotatola Liloba na Ye na eleko oyo, ndenge Asalaka na bileko nyonso, kasi bazali bobele kopesa yango mokongo. Bazali komipesa na mayele na bango moko, ezali—ezali bobele bongo.

174 To ntango mosusu, toloba ete—ete azalaki kokanisa boye. Ntango mosusu soki atekaki Klisto na mosolo ya ebende ntuku

misato, ee, alingaki kozala na—na bondeko na bibongiseli mosusu ya minene ya eleko wana, Bafalisai na Basadukai. Amilobelaki: “Sikawa bozela, Akoki komibundela Ye moko. Nasila komona Ye na bitumba minene; na—nayebi yango—ete Akoki komibundela Ye moko. Bongo nakoki komizuela mwa mbongo, mpo na ko—komibongisela mwa moke ki-mobange, ndenge balobaka. Pe na nsima, mbala mosusu na ntango yango mangomba ya mikolo oyo bakondima ngai, soki natekeli bango Ye.” Bomoni? Kasi amipesaki na mayele na ye moko, na esika na mayele ya koyeba ete oyo wana ezalaki nde Liloba na Nzambe oyo endimisami, pe likambo oyo asalaki Yesu ezali bobele oyo Makomi elobaki ete akosala.

<sup>175</sup> Pe lelo, mangomba ya mokili babimisi Klisto libanda, na mikolo ya suka oyo, bobele ndenge Buku na Emoniseli elobi ete bakosala. Ezali nde molimo na Yuda lisusu, na lolenge ya lingomba: “Bazali na lolenge na kosambela, nde bazali koangana Liloba.” Bomoni? Ya solo. Bongo, hólálá, mbano na yango nde nini? Liwa, bobele ndenge esalaki epai na Ewa. Pe ezali kosalema epai na bato mosusu nyonso oyo bazali koluka kobebisa Liloba na Nzambe, pe komipesa na mayele na bango moko. Ata sikawa bazali koteka, na mbongo ya bibende ntuku misato te, kasi ntango mosusu na kokóma, oh, moto moko monene, oyo abikeli makambo ya likindo. Ekokani na mbongo ya bibende ntuku misato te, kasi bazali koteka yango ata bongo; bazali koteka mayele ya Nzambe oyo bazali na yango, bobele mpo na likambo ya ndenge wana.

<sup>176</sup> Bokeseni nini kati na bango ná moto na mayele Santu Polo, oyo azalaki na boyebi nyonso oyo akokaki komikumisa na yango. Kasi alobaki: “Nabwakaki nyonso wana, makanisi na ngai nyonso. Nakutanaki na Likonzi na Móto, mokolo moko wana nazalaki na nzela na Damaseke.” Pe alobaki: “Nayaki epai na bino na maloba kitoko te, mpo ete soki nasalaki bongo, bolingaki kotia elikia na bino likolo na mayele na bato. Kasi nayaki epai na bino na nguya pe na komonisama ya Molimo Mosantu, mpo ete bo—bomipesa na Liloba na Nzambe.” Amen. Alobaki: “Soko Mwanje na Likolo, ayei kosakwela bino likambo soko nini mosusu, tika ete alakelama mabe,” Bagalatia 1:8. Ezali ya solo. Te, misie. Asala yango soko moke te.

<sup>177</sup> Mwasi moke wana na libulu, azalaki na makambo ya nsoni. Kasi ayebaki ete mangomba ebenganaki ye. Pe, kasi amipesaki soko moke te na mayele na ye moko. Ntango akutanaki na Mobali wana na libulu, Oyo ayebisaki ye masumu nyonso oyo asálá, akendeki na engumba na mbangu. Nzoka nde ezalaki malamumu te mpo na mwasi kosala bongo, ete akende kuna pe aloba likambo soko nini, mpo ete azalaki mwasi ya ndumba. Kasi ntango akutanaki na Yesu, amipesaki soko moke te na mayele na bato ya eleko wana. Akendeki koloba: “Boya kotala Mobali moko

Oyo alobeli ngai makambo nyonso ngai nasála. Ye nde Masiya solo te?” Amipesaki soko moke te na mayele na ye moko. Te.

<sup>178</sup> Mongondo Maria, ntango Mwanje Gabriel ayaki epai na ye pe Ayebisaki ye ete akozua bebé, kozanga koyebana na mobali. Fiu! Esalema naino te. Amipesaki soko moke te na mayele na ye moko, ete mwasi akoki kozua bebé te soki azangi mo—mobali. Amipesaki na yango te. Kasi alobaki: “Tala, nazali Mosali na Nkolo, ésalema na ngai lokola Olobi.” Alobaki te ete “Nakosala yango ndenge nini? Pe nakosala yango ntango nini? Pe nyonso wana ekosalema ndenge nini?”

<sup>179</sup> Mwanje alobaki: “Molimo Mosantu akozipa yo; pe Mwana na Bulee oyo okobota akobengama Mwana na Nzambe.”

<sup>180</sup> Alobaki: “Tala, nazali mosali na Nkolo.” Atiaki motema na makanisi na ye moko te, na koloba ete likambo yango ekoki kosalema te. Alobaki bobele ete : “Tala, nazali mosali na Nkolo.” Ya solo. Botala.

<sup>181</sup> Mwa—mwasi oyo azalaki na malali ya kobima makila, monganga ayebisaki ye, alobaki: “Elikia ezali te.” Abebisaki bozui na ye nyonso epai na minganga, kasi ata moko na bango akokaki kosunga ye te. Pe amipesaki na yango te. Ntango Yesu . . . Amikotisaki kati na ebele na bato, pe alobaki: “Nandimi ete soki nakoki kosimba elamba ya Mobali oyo, nakobika.” Pe abelemaki.

<sup>182</sup> “Sikawa zela moke, monganga alobaki ete ‘Okoki kobika te.’” Asilaki kozala na malali ya kobima makila wana bambula na bambula. Azalaki kolemba ntango nyonso, pe bokono ezalaki kokóma makasi. Minganga balobaki ete akokufa. Mayele na bango ekómaki na suka.

<sup>183</sup> Kasi alobaki, na kondima! Eteni ya Likomi moko te eyebisaki ye ete asala bongo. Kasi alobaki: “Soki nakoki kosimba nsonge ya elamba na Ye, nakobika,” bongo amikotisaki kuna pe asimbacki Ye. Azongaki, akei kofanda.

<sup>184</sup> Pe Yesu abalukaki pe Alobaki: “Nani asimbi Ngai?” Atambwisaki miso kino Amonaki ye. Ayebisaki ye likambo ya malali na ye ya kobima makila.

<sup>185</sup> Pe bobele na ngonga yango, ayokaki na kati na nzoto na ye. Na ntango wana akokaki kotalisa yango polele te, kasi ayokaki na kati na nzoto na ye ete malali na ye ya kobima makila esilaki. Abanza-banzaki soko moke te ete “Soki monganga alobaki ete akokufa, ndenge nini eloko mosusu ekokaki kosunga ye?” Atiaki motema na kobanza-banza soko moke te, kasi atiaki motema na kondima.

<sup>186</sup> Nzoka nde Biblia elobi ete “Azali lelo Nganganzambe Mokonzi, oyo Akoki koyoka mpasi esika moko na biso kati na bolembu na biso.” Ezali ya solo? [Losambo balobi: “Amen.”—N.D.E.]

Kotia motema na makanisi te, na koloba: “Oh, ezali nde . . .”

Alobaki: “Azali bongo lelo. Azali sikawa mpenza Nganganzambe Mokonzi oyo Akoki koyoka mpasi esika moko na biso kati na bolembu na biso. Azali ndenge moko lobi, lelo, pe libela!”

<sup>187</sup> Okoki komikanisela ntango nazalaki kuna, motei ya ba-Batiste, pe Mwanje na Nkolo ayaki kokutana na ngai kuna, pe Apesaki ngai etinda ete nakende kosala mosala oyo nazali kosala sikawa? Kasi, mokengeli na ngai alobaki: “Óbeli nde liboma. Toloba, yo, óloti nde ndoto.”

Nalobaki: “Ekozala malamumu ete ókamata kalati na ngai ya mondimi sikawa.”

<sup>188</sup> Bongo, alobaki: “Ndenge nini yo, oyo ósilisi ata eteyelo ya liboso te, ókoteya na mokili mobimba? Ndenge nini ókobondela mpo na bakonzi ná bankumu, wana o—o—ozali ata na elobeli ya malamumu te?”

<sup>189</sup> Natiaki motema na elobeli na ngai te. Natiaki motema na makoki na ngai moko te. Nazuaki etinda. Aleluya! Pe natiaki motema na kobanza-banza te. Pe soki náyókáká makanisi, na ntembe te bankoto na bankoto ya bato balingaki kokufa, bambula eleki. Kasi namemi Nsango moko, bobele ndenge Alobaki, zongazonga na mokili mobimba.

<sup>190</sup> Pe nazali kokende lisusu, na ngolu na Nzambe; na makanisi na ngai te, kasi na etinda. Aleluya. Namipesaki te na . . . Bozali koloba: “Ózali na mbula ntuku mitano na mitano.” Ata soki nazalaki na yango ntuku libwa na mitano, ezali na ntina te. Azali bobele Nzambe yango oyo Azalaki na Abalayama. Iyo, misie. Bomipesa na boyebi na bino moko ya makambo te.

<sup>191</sup> Pe, nsima na elembo kokende liboso, Mongongo elandaki, mangomba babandaki kopesa ngai mokongo pe kokangela ngai bikuke na bango, na ntina na Malakisi, nzoka nde ata moko na bango azali komeka koya liboso na ngai pe koloba ete Yango ezali solo to lokuta te. Nazali kobeta móndengé na moto soko nani kati na bango. Iyo. Ezali mpo na kosala mayele mabe te, kasi nayebi epai natelemi. Ya solo. Basalaki nini? Basalaki nini? Bakangaki bikuke nyonso. “Sikawa bino bokosala nini?”

<sup>192</sup> Mokolo wana, nazalaki kuna, likolo na ngomba. Nalobaki: “Nkolo, na ekólo mobimba ekuke oyo efungwami mpo na ngai ezali bobele moko, na ndenge nayebi, ezali nde na Phoenix, Arizona. Esika moko mpamba oyo nazali na yango.” Pe wana nazalaki kokita na ngomba. Naino nayóká mongongo ya moto polele bongo te, Alobaki: “Ekosala yo nini? Yo, landa nde Ngai.” Bongo, na mayele na ngai moko te. Nakomipesa nde na elaka na Ye.

<sup>193</sup> Oh, moninga na ngai, komipesa na makanisi te. Na bongo, ganga lokola Eddie Perronet oyo ya kala:

Bato nyonso babeta maboko mpo na nguya ya  
 Nkombo na Yesu!  
 Banje bafukama; Boya na motole ya bokonzi,  
 Bolatisa Ye motole lokola Nkolo na bato  
 nyonso;  
 Bolatisa Ye motole lokola Nkolo na bato  
 nyonso.

<sup>194</sup> Ezali ya solo. Komipesa te na oyo yo ozali kokanisa, na oyo moto mosusu azali kokanisa. Na kondima yamba elaka na Nzambe. Okolinga kosala yango? Sikawa ezali te likambo ya koyeba soki moto mosusu asila kosala yango to asala yango naino te, kasi yo olobi nini? Okosala nini na Yesu oyo abengami Klisto, oyo Azali komimonisa lelo, bobele ndenge Asalaki na eleko oyo kuna? Bokondimela Ye? [Losambo balobi: "Amen."—N.D.E.]

Tobondela.

<sup>195</sup> Nkolo Yesu, Mokonzi na bankonzi, Nkolo na bankolo, Nzambe na banzambe, Nzambe na bankumu nyonso; Moto na liboso, Moto na suka; Alifa, Omega; Ebandeli pe Suka; Monzoto Mokongengaka na Ntongo, Felele kitoko na Salono, Lísi ya Lobwakú, Ntina pe Libota na Dawidi; yaka, Nkolo Nzambe, motindo moko lobi, lelo, pe libela!

<sup>196</sup> Pambola ebele na bato oyo, Nkolo. Oyo . . . [Eteni oyo ezangi maloba na bande—N.D.E.] oyo esili kobeleva mpo na kobanda lobi. Tosali mwa mayangani awa, pe Ópamboli biso kati na yango. Ómimonisi Yo moko kati na biso. Nabondeli, e Nzambe, ete Ókoba komimonisa kati na biso. Pambola biso na mpokwa ya lelo. Sunga biso sikawa. Tozali bato na bosenga.

<sup>197</sup> Pe, Nkolo, Yo oyebi ete ngai nalingaka kogangela bato te, kasi ndenge nini nakoki kokanga monoko na eloko ya bulee boye oyo ezali kopela kati na ngai? Nalingaka kosala bongo te, Nkolo. Óyebi bomoi na ngai, motema na ngai. Nasengeli kosala yango. Pe nazali kobondela, e Nzambe, ete Ósunga ngai nasala yango. Pesa ngai bobele ngolu, pe namipesa soko moke te na mayele na ngai moko, kasi namipesa na elaka na Yo. Na Nkombo na Yesu. Amen.

<sup>198</sup> Nalingi ete bino nyonso bozala mpenza na limemia mpo na mwa ntango moke. Kati na ebele na bato oyo, na ntembe te, mibali pe basi bafandi awa, oyo bazali kobela. Bato boni bazali na bokono pe na mpasi awa, botombola maboko, boloba bobele: "Nazali na bosenga na Nzambe."? Botombola bobele maboko, kuna: "Nazali na bosenga na Nzambe."

<sup>199</sup> Bongo, ngai nayebi bato mingi te. Nayebi bandeko misato oyo bafandi bobele awa. Nayebi Mr. Dauch ná mwasi na ye oyo bafandi kuna. Nakanisi, nakanisi ete oyo ezali Ndeko mwasi Moore. Nayebi malamú mpenza te. Ezali bongo, Ndeko mwasi Moore? Libanda na bango, namoni ete esili, mpo na Ndeko Mike



na eteyelo. Na ndenge nayebi, kokokana na oyo nazali komona, baoyo nyonso nayebi.

<sup>200</sup> Kasi Tata na Likolo Oyo apesaki elaka, pe ete na mikolo oyo Akomitatola na eleko oyo, bobele ndenge Asalaki na Sodoma. Alakaki yango? [Losambo balobi: “Amen.”—N.D.E.] Ete Akomimonisa! Bondimi yango? [“Amen.”]

<sup>201</sup> Sikawa, soki bolingi kobondela, pe na kondima! Koluka kobanza-banza wana te: “Nakosimba Ye ndenge nini lokola Nganganzambe Mokonzi?”

<sup>202</sup> Nzoka nde, Biblia elobi, na Kondimana na Sika: “Azali Nganganzambe Mokonzi sika-sikawa. Atikali lokola Nganganzambe Mokonzi na molongo ya Melkisedek. Azali Nganganzambe Mokonzi mpo na Libela. Nganganzambe Mokonzi mosusu azali te bobele Ye. Molobeli mosusu kati na bato ná Nzambe azali te, bobele Moto oyo Klisto.” Ezali ya solo. Azali bobele Ye moko, pe Azali ndenge moko lobi, lelo, pe libela.

<sup>203</sup> Bongo soki Azali naino bobele Nganganzambe Mokonzi yango, pe Biblia elobi: “Tokoki kosimba Ye na mpasi pe na bolembu na biso,” lokola mwasi oyo asimbacki elamba na Ye, kondima na yo ekoki kosimba Ye na mpokwa oyo, pe Akosala bobele bongo, kati na mosuni na moto, lokola Asalaki ntango Azalaki kati na mosuni na moto kuna na—na nzete ya Abalayama. Bokondima yango? [Losambo balobi: “Amen.”—N.D.E.] Alakaki ete Akosala yango. Sikawa bobondela, moto nyonso oyo azali na bosenga. Pe ngai—ngai . . .

<sup>204</sup> Ezali ndenge nalobaki, likabo ezali eloko moko lokola kokamata mbeli te, pe soki olingi kokata na yango eloko *boye*, okati bobele; to kokata eloko *oyo*, *yo* okoki kokata yango, to eloko oyo olingi kosala na yango. Oyo wana ezali likabo na Nzambe te. Bomoni? Te.

<sup>205</sup> Likabo na Nzambe ezali makoki oyo ozali na yango ya komilongola na nzela. Makabo pe kobiangama euti na kobongisama liboso ya Nzambe. “Makabo pe kobiangama ikobotolama te.” Obotami na yango. Ezali levié oyo ekoki kosunga yo ete okotisa vitési, kasi okoki konyata aksélérater te. Omoni? Nzambe moto asengeli kosalela yango. Osengeli komilongola na nzela.

<sup>206</sup> Kondima na yo ekoki kosala yango, kasi oyo ya ngai te; oyo ya yo. Oyo ya ngai, bobele ete amilongola na nzela. Bondimi na motema mobimba ete Yesu Klisto azali na bomoi lelo.

<sup>207</sup> Omipesa na mayele na yo moko te, ozali koloba: “Ee, tala sikawa, bo—bokono na ngai ezali makasi mingi, ndeko. Oyebi ngai te. Naumeli na kiti ya bibosono oyo. Naumeli na . . .”

<sup>208</sup> Ndenge ouméla etali ngai te, tala soki Nzambe akokita te mpo na kosala bobele ndenge Asalaki ntango Azalaki awa na

mokili kati na nzoto na moto. Akosala yango kati na nzoto na yo, kati na nzoto na ngai, elongo wana tozali kosala lisanga pe tozali kondimela Ye. Akosala yango mpo ete Alakaki ete Akosala yango.

<sup>209</sup> Sikawa komipesa te na oyo moto moko alobi: “Oh, ezali—ezali nde botangi ya makanisi,” ndenge babengaka Yango. Balobelaki Yesu bobele bongo. Balobaki ete Azalaki moto na soloka, “molimo mabe.” Kasi Azalaki mwana na Nzambe, mpo ete Alongobanaki na Liloba na Nzambe oyo elakami.

<sup>210</sup> Sikawa, ndenge nalobaki, bisika oyo—oyo tozali na yango, totindami kozala na yango te, ete toya kotielala bato maboko. Totielaki bango maboko lobi na mpokwa. Kasi eloko moko oyo bosengeli kozala na yango ezali nde kondima, pe na nsima kokata ntina. Na kondima boyambi yango, na kondima. Kasi na—na eloko soko nini te oyo . . .

Boloba te: “Ee, bongo ekosalema ndenge nini?”

<sup>211</sup> Soki nakokaki koyebisa bino ndenge esalemaka, na ntango wana ekozala lisusu kondima te. Ngai nayebi ndenge esalemaka te. Nayebi te, kasi nandimaka yango. Ngai—ngai nayebi ndenge—ndenge Nzambe abikisaka mosumuki te, kasi Asalaka yango. Nayebi te lolenge nini Nzambe asalaka makambu oyo nyonso, kasi ngai nandimi yango. Ye, Asalaka yango, pe ezali bongo. Mpamba te, nakoki kolimbola yango te. Sikawa, ee, ngai. . . Yango ekoki kolimbolama soko moke te. Ata na moto moko te. Mpo soki olimboli yango, na ntango wana ezali lisusu kondima te.

<sup>212</sup> Nakoki te kososola ndenge Nzambe ná Klisto bakoki kozala Moto se moko, kasi Bazalaki moko. Makomi elobi bongo. Ee, okoki kolimbola yango te, kasi, Bazalaki moko. “Tata na Ngai azali kati na Ngai. Ngai moto nazali kosala misala oyo te; ezali nde Tata na Ngai oyo azali kati na Ngai. Soki Nazali kosala misala na Ye te, na bongo, yango ezali kotalisa ete Nazali ya Ye te. Kasi soki Nazali kosala misala na Ye, na ntango wana Ye moko azali kotatola ete Nazali ya Ye.”

<sup>213</sup> Ee, ezali ndenge moko sikawa, bobele ndenge moko mpenza. Azali ndenge moko lobi, lelo, pe libela, soki okondima.

<sup>214</sup> Sikawa mobali moko afandi bobele na nsima na ngai awa, azali na suki moindo. Alati móntele na loboko, kazaka ya moindo. Alati matalatala. Soki botali awa, bokomona ye afandi pe akangi miso, azali kobondela. Ngai nayebi mobali yango te. Tata na Likolo ayebi ete ngai nayebi ye te. Kasi nakotala likambo na ye na mwa ntango moke, mpo ete azali komonana ete azali mpenza sembo, afandi wana. Banda nalobi likambo yango, mobali yango akangi bobele miso pe abandi kobondela. Mobali yango nayebi ye te, ya solo, na maboko na ngai. Nayebi ye te. Nzambe ayebi mobali yango, pe Akoki komonisa ngai. Soki elaka yango ezali solo kati na Biblia, Akoki komonisa ngai ntina

nini mobali oyo akangi miso, pe mpo na nini azali kobondela. Bondimi yango? [Losambo balobi: “Amen.”—N.D.E.]

<sup>215</sup> Ondimi yango, misie? Soki olingi kofungola miso, yo moto ofandi awa, tala awa. Ondimi yango? Malamu. Sikawa oyebi ete ngai nayebi yo te. Toyebani te ngai na yo. Kasi Nzambe ayebi yo. Sikawa abandi kolela, azali kotangisa mpizoli. Mpamba te, nakoki koyebisa ye sikawa ete Nzambe akoyanola lilombo na ye, bomoni, mpo ete yango euti kosimba ye, Pole wana; elongoli molili ekómi Pole. Bomoni?

<sup>216</sup> Na bongo, mobali yango, azali kobondela mpo na moto mosusu, pe ezali nde elenge mobali oyo afandi pembeni na ye. Azali mwana na ye. Ya solo. Bongo, elenge mobali yango azali kotungisama na—na malali ya likundú, pe lisusu eloko moko ezali malamau te na misopo na ye. Ya solo. Ya solo.

<sup>217</sup> Yo ozali moto ya awa te. Ozali moto ya Arizona te. Ozali moto ya Californie. Ya solo. Pe ozali motei, pe osambelaka na ba-Assambée de Dieu. Ezali ya solo. Nkombo na yo Reverend Keig, to, Reverend Keig, ya solo. Ezali ya solo? Pepa maboko na yo *boye*. Sikawa mwana na yo akokóma malamau. Bomoni? Kondima na yo!

<sup>218</sup> Sikawa likambo nini? Bongo, mobali yango ye wana, maboko likolo, ayebi ngai te, ngai pe nayebi ye te. Kasi eloko nini esalemi? Asimbi Nganganzambe Mokonzi. Bongo, bomoni, akokaki komipesa na mayele na ye moko te. Sikawa, eloko oyo asengeli kosala, eloko nini etikali ete asala? Asengeli kondima ete makambo oyo elobameli ye, ezali solo, mpo ayebi ete ayebi ngai te. Ezali solo.

<sup>219</sup> Tala, mwasi moko afandi awa liboso na ngai, ye pe, agumbi motó na ye. Azali kobela kanser. Ye pe auti na Californie. Nazali kolikia ete akozanga yango te. Mademwazél Adams, nkombo na yo yango wana. Naino namona ye te na bomoi na ngai. Iyo, ezali solo.

<sup>220</sup> Mwasi moko afandi na suka *awa*. Nakoki te kotia, bobele kolakisa ye mosapi, kasi nazali komona Pole etelemi likolo na ye. Azali kotungisama makasi. Likambo ya liboso, azali na mpasi na kingo. Pe likambo mosusu ye—ye azali na—na mitungisi ya molimo, azali komitungisa mpo na yango. Pe azali na kokoso na ndako; mwana na ye ya mwasi auti kokima. Ya solo. Ezali ya solo, boye te? Atomboli loboko na ye. Madame Miller, ya solo. Ondimi yango? Nzambe akozongisa ye, Akobikisa nzoto na yo. Sikawa, naino namona ye na bomoi na ngai te. Na mobimba azali mpenza mopaya mpo na ngai.

<sup>221</sup> Mwasi moko afandi awa, kati na losambo. Ye—ye azali moto ya awa te, ye pe auti na Californie. Azali na kanser, pe kanser yango ezali na libele na ye. Basila kopasola ye na ntina na yango, na libele moko, pe kanser yango ekatishi na libele mosusu. Ezali solo. Madame Calvin. Ezali ya solo. Ozali kondima ete Nzambe

akobikisa yo? Ondimi yango. Nazali mopaya mpo na yo, mwasi. Nayebi yo te. Ezali solo. Bomoni? Azali na kanser.

Mpo boyeba ete Nzambe azali awa!

222 Mwasi moko afandi mpenza pembeni na ye. Nkombo na ye Madame Harris. Azali mpenza mopaya mpo na ngai. Kasi ntango Molimo esimbi mwasi oyo, ye pe ayokeli ye mawa. Pe auti na Californie. Ezali solo. Pe azali na mpasi na lipeka na ye. Ezali solo. Ondimi ete Nzambe akobikisa yo. Soki ezali ya solo, tombola loboko mpo ete bato bamona; azali mpenza mopaya mpo na ngai.

223 Komipesa na mayele na yo moko te. Eloko nini ekoki kosala yango? Okoki kolimbola yango te. Ezali likamwa. Ekoki kolimbolama te. Tuna bato oyo; naino namona bango te na bomoi na ngai, nayebaki ata eloko moko te na ntina na bango. Ekoki kokoba boye, na losambo mobimba.

224 Kasi, sikawa botala, bomipesa na mayele na bino moko te. Kasi bomipesa na oyo Ye alakaki, ete Akosala yango; soki ezali te bebele Molimo yango oyo efandaki kati na mosuni na moto, oyo eyebaki ete Sala asekeki kati na hema, na nsima na Mobali wana. Ezali ya solo? Pe Alakaki, bebele liboso ete mokili ebebisama na móto, ntango Mwana na moto Akomimonisa lisusu bebele na motindo yango, ndenge mwa—Mwana na moto (ya esakweli) Akomimonisa kati na mosuni na moto ndenge Azali awa elongo na biso na mpokwa oyo, ndenge Asalaki na ntango oyo kuna. Bongo tozali kobika na eleko nini? Mpenza pene na kobebisama.

225 Moninga na ngai, koumela mosumuki ntango molai te, ntango ozali awa. Yamba Yesu Klisto wana ozuami Liboso na Ye. Bongo, nayebi, mbala mingi ezali momesano mpo na batei ya kosenga-senga pe ya kobeta masolo, na ntina na mama oyo akufa pe azali na ngambo mosusu. Ezali mabe te. Kasi toyaka te mpo mama na biso akufa. Mama na ngai pe akufa; tata na ngai pe lokola. Kasi toyaka, na lisosoli mpenza, pe tondimaka mpo Nzambe Amimonisaki kati na Yesu Klisto, mpo na kolongola masumu na mokili. Toyaka pe totiaka kondima na biso kati na lisoli yango. Pe wana Atatoli Liloba na Ye . . .

226 Lingomba osambelaka, etali ngai te, ézala Metodiste, Batiste, Katoliko, Presbiterien, to lingomba moko te. Soki obelemi mpo na kondima ete ososolaki yango ndenge mosusu, pe oyebi ya solo ete naino obotami lisusu te, kasi ozali na mposa na yango, pe ozali na mposa na yango sikawa, elaka sikawa. Ntango mosusu okotondisama sikawa te, kasi okotondisama ntango . . . wana mayangani ezali kokoba. Soki olingi koyamba yango uta na makambo oyo, okolinga kotelema pe ngai nakobondela mpo na yo, bebele esika otelemi. Moto nyonso awa oyo ayebi . . .

227 Komipesa na yo moko te, ee, na koloba: “Nalobaki minoko na sika.” Sikawa, oyo wana ezali na ntina moko te. Ngai pe nandimaka minoko na sika.

228 Kasi nasílá komona bandoki, milimo mabe, pe nyonso mosusu, koloba minoko na sika pe kolimbola yango. Ya solo. Botuna ba-ntóma oyo bazali awa, tokoki kotuna nsango, Ndeko Creech, oyebi ete ezali solo. Nasílá komona bango koloba minoko na sika, pe komela makila na mokuwa ya motó ya moto, kobianga milimo mabe. Solo mpenza. Nasílá komona bango kotia ekomeli na mabele, pe etelemi pe ekomi na minoko oyo eyebani te; pe mwasi ndoki, mobali ndoki atelemi wana, alimboli yango.

229 Na bongo, koloba minoko na sika ezali elembo te ete ozali na Molimo Mosantu. Soki yango, soki olobi minoko na sika pe oboyi Liloba oyo, eloko moko ya mabe ezali na esika moko boye. Ezali ya solo, iyo, ezali ya solo. Komipesa na mayele na yo moko te.

230 Bongo moto moko, okoloba: “Ee, ngai nagángá.” Ngai pe nagángá. Kasi komipesa na yango te.

231 Nasílá komona nguya ya milimo mabe ya ndenge na ndenge koganga-ganga pe kobelela. Nasílá komona ba-mizilmá koganga pe kobelela, bazalaki komemama mpenza kino ete bazalaki komizokisa maboko na bantonga. Na Inde, nasílá komona bango koganga, kopumbwa-pumbwa, kokamata ba-bále ya mai, oyo ekangami na bandobo, pe kokotisa yango na mposa ya nzoto na bango, pe kotambola likolo na makala ya móto, ya solo, nzoka nde bazali koboya Yesu Klisto.

232 Omoni, komipesa na mayele na yo moko te, kasi na Liloba na Nzambe. Soki bomoi na yo elongobani na Biblia oyo te, mpo na kondima Liloba moko na moko oyo ezuami na kati; kasi olingi ete ondima yango, pe olingi ete Nzambe asala mokano na Ye kati na yo, mpo ete okoki kozala eteni na Nzambe, okolinga kotelema pe koloba: “Nakoyamba yango bobele sikawa, ndeko.” Natondi yo. Natondi yo. Nzambe apambola yo. Nzambe apambola yo. Nzambe apambola yo. Nzambe apambola yo. Nzambe apambola yo. Nzambe apambola yo. Tika ete Nzambe apesa bino yango, bino nyonso oyo bozali sembo. Bozali koloba . . . Bokoba bobele—bobele kotelema, bobele . . .

233 Ozali koloba: “Nazali mondimi ya lingomba, Ndeko Branham, kasi mpenza-mpenza nazali Pentekotiste; kasi mpo na koloba solosolo ete nakoki kondima ete Liloba oyo nyonso ezali Solo, nakoki na ngai kosala yango te, kasi na—nazali na mposa ya kosala yango. Yo sunga ngai, bondela mpo na ngai. Nalingi kotelema pe koloba: ‘Ngai—ngai . . .’” Ozali koloba: “Ee, tala, ngai oyo nafandi awa, to natatoli kati na losambo oyo, oyo nazalaki.” Kasi oyebi yango, na nse na motema na yo, ete ozali bongo te. Nzambe pe ayebi ete ozali bongo te, omoni, bongo mpo na nini okotelema te. Komipesa na mayele na yo moko te, kasi mipesa na Liloba na Nzambe.

234 Bokolinga kotelema, bato mosusu? Moto mosusu akolinga kotelema? Nzambe apambola yo. Nzambe apambola yo. Nzambe

apambola yo, ná yo pe. “Nzambe, sunga ngai.” Nzambe apambola bino nyonso. Malamu. Bokoba bobele kotelema.

235 Ozali koloba: “Bolamu nini yango ekosala ngai?” Telema bobele mbala moko, okomona eloko oyo yango ekosala. Zala mpenza sembo: “Nazali na mposa, Ndeko Branham, nazali na mposa ya kozala sembo. Nazali na mposa ya kozala sembo.”

236 Bongo, nalobi te ete óbima na losambo na yo. Te, misie. Tikala bobele epai ozali, kasi zala mpenza moto oyo atondisami na Molimo Mosantu kati na losambo wana. Ozali koloba: “Ee, nayebi te eloko nini mokengeli na ngai akoloba.” Akokumisa yo soki ozali bongo, soki azali moto na Nzambe. Ya solo.

237 “Tika ete moi na bino engenga liboso na bato, ete bamona misala na bino malamau pe bakumisa Tata na bango.”

238 Nzambe apambola yo. Ee, Nzambe apambola bino nyonso mibale, ná yo; ná yo, ndeko, yo. Nzambe apambola bino, moko na moko. Nzambe apambola yo. Nzambe apambola yo, yo awa.

239 Sikawa bino baoyo botelemi, soki bomiyoki malamau nsima na bino kotelema, botombola bobele maboko mpo na kolakisa na baoyo mosusu ete bino bomiyoki malamau nsima na bino kotelema. Bomoni, maboko nyonso oyo. Na ntembe te, bozali komiyoka malamau. Bomoni, bozali sembo. Botelemi, mpo na koloba: “Ngai nakotatola.”

240 “Ye oyo akozua ngambo na Ngai awa, Ngai pe nakozua ngambo na ye kuna. Ye oyo akoyokela Ngai nsoni awa, liboso na bato oyo, Ngai pe nakoyokela ye nsoni liboso na Tata na Ngai ná Banje na bulee.” Koyokela Ye nsoni te. Komipesa na makanisi na yo moko te. Mipesa nde na Liloba na Nzambe. “Ye oyo akoyambola Ngai liboso na bato, Ngai pe nakoyambola ye liboso na Tata na Ngai ná Banje na bulee.”

241 Bamosusu bakoki kozala, liboso mpenza ete tobondela? Bongo, togumba motó. Nzambe apambola yo, ndeko mwasi. Na ntembe te. Nzambe apambola yo, yo pe, ndeko. Solo mpenza. Mosusu akoki kozala, bobele wana togumbi motó? Nzambe apambola yo, ná yo. Boye, ezali malamau, bokotikala botelemi. Tokozela bobele mwa moke, bobele mwa moke. Nzambe apambola yo, ndeko. Nzambe apambola yo. Bokoloba: “Boye yango ezali na ntina, koloba: ‘Nzambe apambola yo?’” Oyo wana nde lolenge na ngai ya kopambola bino. Nzambe apambola bino.

242 Bamosusu kati na bino baoyo botelemi pembeni na etutu, baoyo bozangi bisika ya kofanda, bokolinga bobele kotombola maboko na bino, koloba: “Ngai, e Nzambe, ezali nde ngai.” Nzambe apambola yo, ndeko mobali. Nzambe apambola yo, ná yo pe; ndeko mwasi, yo pe, ndeko mobali; yo pe, ndeko mwasi.

243 Oh, Molimo Mosantu azali kotambola na bopolo mpenza kati na losambo. Bokoki koyoka Ye? Nzambe apambola yo, elenge

mobali, yo awa na eteyelo. Nzambe apambola yo, yo kuna na coin. Nzambe apambola yo, elenge mobali. Iyo.

<sup>244</sup> E Molimo Mosantu, sala lisusu kati na mitema na biso. Lakisa biso mabunga na biso, Nkolo. Bisu te . . . Bisu tolingi te komipesa na mayele na biso moko, na mabanzo na biso moko. Kasi tomipesi na Yo, mpo toyebi ete totelemi liboso na elaka na Yo Nzambe, oyo endimisami lelo. Yo moko Omimonisi likolo na nyonso, likolo na mabanzo nyonso. Tokoki kobanza-banza to kolimbola likambo yango te. Kasi Okiti awa, elongo na biso sikawa, pe Olakisi biso ete Ozali awa, pe mibali ná basi bandimi pe bayambi yango.

<sup>245</sup> E Nzambe, memá moko na moko na biso na ntolo na Yo, pe bomba bango kati na Libanga na Bileko, kino ete ba-móto eleka. Etikali moke tozikisama, Nkolo. Toyebi yango. Tozongi lisusu na Sodoma. “Kasi bayengebeni bakokufa elongo na bato mabe te.” Okobenga bana na Yo, Nkolo. Oyebisaki Lota: “Bima kuna, bima.” Nabondeli, e Nzambe, ete moko na moko oyo azuami na motindo wana na mpokwa oyo, oyo azali kuna, oyo ayebi malamau te epai atelemi . . .

<sup>246</sup> E Nzambe, baboyi komeka kokende na nzela oyo mituka ezali koya epai na bango. Baboyi komeka kokatisa mwinda motane, soki lisosoli na bango ezali malamau, mpo ete bakoki kokufa. Bongo ndenge nini bato bakoki kondima likama mpo na Seko na Seko na bango, bobele na kokanisáká, kobanzáká, komekameka kozanga mpenza kondimisama na komekameka, mpo bazali bandimi ya lingomba to ebongiseli moko boye? Pe ya solo bakoki te, bakoki kososola te ete Liloba na Nzambe ekoka kozala lelo ndenge ezalaki kala, ndenge bilaka oyo ekoki komonisama. “Eleko na bantoma, esílá koleka.” Sunga bango, Tata. Napesi Yo bango na Nkombo na Yesu Klisto. Amen.

<sup>247</sup> Natondi yo, ndeko na ngai ya mobali, to ya mwasi. Nazali na esengo ya kobenga yo ndeko na ngai ya mobali, to ya mwasi.

<sup>248</sup> Bobosana te ete, Nzambe akotuna ngai mpo na liloba moko na moko, na Mokolo ya Kosambisama. Makambo nyonso oyo natei na mpokwa oyo, nasengeli kosamba mpo na yango. Nayebi yango malamau. Nasali nini banda bomwana, nateyi Nsango Malamau oyo, bongo na nsima nabwakama?

<sup>249</sup> Sikawa, bato boni kati na bino bazali na bokono pe na mpasi, awa na mpokwa oyo, pe balingi ete babondela mpo na bango? Botombola maboko. Bokolinga lisusu kosala eloko moko mpo na ngai? Botia maboko bamoko likolo na bamosusu. Botielana maboko. Moto nyonso agumba motó sikawa, bobele lokola ete ozalaki kati na losambo, awa na eteyelo.

<sup>250</sup> Nzambe Molingami, na Nkombo na Yesu Klisto, pe ya Bozali na Ye, Bozali oyo endimisami! Liloba mpenza oyo eteyami, pe endimisami ete Yo ozali ndenge moko lobi, lelo, pe libela. Tika ete Molimo Mosantu ya Nzambe azinga ebele na bato oyo sikawa.

Mingi kati na bango bayei pe bayambi Yo lokola Mobikisi na bango, bazóngi nsima mingi bayambi Yo pe bazongi. E Nzambe, nabondeli na Nkombo na Yesu Klisto, ete Obikisa moto moko na moko. Olobaki: “Bilembo oyo ekolanda bango bakondima: soki batieli bato na malali maboko, bakobika.” Yo olakaki yango, Nkolo, pe bana oyo bazali kondima batielani maboko bamoko na bamosusu.

<sup>251</sup> Satana, olongami. Bima kati na bato oyo, na Nkombo na Yesu Klisto. Tika bango bakende, mpo na litomba na Bokonzi na Nzambe, na Nkombo na Yesu. Amen.

<sup>252</sup> Bino nyonso baoyo bozali kondima ete Yesu Klisto azali sikawa mobikisi ya nzoto na bino, pe lokola Mobikisi ya milimo na bino, pe bolingi koyamba Ye likolo na makambo wana, botelema, boloba: “Nayambi Yesu sikawa lokola mobikisi ya nzoto na ngai, pe lokola Mobikisi ya molimo na ngai.” Ezali malamumu mingi! Nkembo na Nkolo! Natondi Yo Nkolo! Sikawa totombola maboko pe toyembela Ye.

Nakokumisa Ye, nakokumisa Ye,  
Nakokumisa Mwana na mpate oyo akufaki  
mpo na basumuki;  
Bopesa Ye nkembo, bino bato nyonso,  
Mpo ete Makila na Ye elongoli matono nyonso.

<sup>253</sup> Oh, bozali komiyoka malamumu, boye te? Bopepa maboko. Hólálá! Tika toyemba yango lisusu.

Nakokumisa Ye, nakokumisa Ye,  
Nakokumisa Mwana na mpate mpo na...  
(Bobosana te ete Mwana na mpate yango  
azali “ndenge moko lobi, lelo, pe libela”.)  
Bopesa Ye nkembo, bino bato nyonso,  
Mpo ete Makila na Ye elongoli matono nyonso.

<sup>254</sup> Bolingi yango? [Losambo bagangi: “Aleluya!”—N.D.E.] Amen. Tosembola loboko mpo na kopesa mbote na moninga. Tofongoli mayangani, Tobandi likita. Boloba: “Nzambe apambola yo, ndeko, moleki nzela. Nzambe apambola yo.” Ezali kitoko. Ezali malamumu. Kitoko mingi! Sikawa bozali kondima ete tokozala na likita moko ya monene, nsima na liyangani oyo? [“Amen.”] Totondi Nzambe mpo na mayangani ya minene, pe sikawa tokozala na likita moko ya monene. Baoyo nyonso bandimi yango baloba: “Amen.” [“Amen.”]

Kondima na ngai etali likolo epai na Yo,  
Yo Mwana na mpate (totala likolo epai na Ye  
sikawa) ya Kalvari,  
Nzambe Mobikisi;  
Sikawa yoka ngai wana nazali kobondela,  
Longola masumu na ngai nyonso,  
E tika ete banda lelo  
Nazala mobimba wa yo!



Na bomoi na ngai wana nazali kotambola na  
 banzela ya molili,  
 Pe mawa ezingi ngai,  
 Zala Mokambi na ngai;  
 Tinda ete molili ékóma pole,  
 Longola nsomo na ngai nyonso,  
 E tika ete banda lelo  
 Nazala mobimba wa yo!

<sup>255</sup> Amen! Losambo balobi: “Amen.” [Losambo balobi:  
 “Amen.”—N.D.E.] Aleluya!

Oh, bokumisa Ye,  
 Bokumisa Mwana na mpate oyo akufaki mpo  
 na basumuki;  
 Bopesa Ye nkembo, bino bato nyonso,  
 Mpo ete Makila na Ye elongoli matono nyonso.

Ndenge ezali malamau mpenza!

<sup>256</sup> Malamau, sikawa tokoki kogumba motó mpo na lipamboli.  
 Ngai nayebi moto oyo aponamaki mpo na kosala yango te. Ndeko  
 Johnny Manadal, ya Californie, wana togumbi motó. Sikawa  
 bobosana lobi na mpowa te, ekozala ya liboso, ya ebandeli. Lobi  
 na mpokwa, likita ekozala bobele awa, bobele awa na ndako oyo,  
 na ngonga ya nsambo na ndambo.

<sup>257</sup> Nzambe apambola bino. Bosepeli na Bozali na Nzambe?  
 [Losambo balobi: “Amen.”—N.D.E.] Amen. Sikawa togumba  
 motó wana Ndeko Johnny azali kosukisa liyangani mpo na  
 biso.



*KOMIPESA NA MAYELE NA YO MOKO TE* LIN65-0120

(Lean Not Unto Thy Own Understanding)

Liteya oyo ya Ndeko William Marrion Branham, eteyamaki liboso na Ngelesa mokolo mwa misato na mpokwa, mokolo mwa 20, sanza ya yambo, na mobu 1965, mpo na Lisanga ya Molóngó ya Bato na Mombongo ya Nsango Malamu Mobimba na Motel Ramada na Phoenix, Arizona, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2014 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)